



增補甘泉縣志

函肆拾

ル 5
3144
14



凡 5
3144
卷 14

增修甘泉縣志卷十六黃門尉張宏運

甘泉縣知縣吳鄂峙 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成敷 桂正華 朱公純 增訂

列女上

三國吳孫奇妻者廣陵范慎女名姬年十八配奇一年而奇亡慎以姬少寡無子迎還其家姬不肯歸迎者以其父母命迫之姬遂持刀割耳及鼻曰父迎我者不過以我年少而色美今已殘矣行將焉如於是迎者空返

列女

增修甘泉縣志

卷十六

列女

一

晉華譚母譚廣陵人也譚祖融吳左將軍錄尚書事父
譚黃門侍郎譚期歲而孤母年十八便守節鞠養勤勞
備至及長好學不倦為鄰里所重太康中刺史嵇紹舉
譚秀才至洛城武帝五策之時九州秀孝無逮譚者官
至祕書監所歷有美政識者歸功於母教云 晉書本傳

按三國志裴松之所引文士傳華融在吳官
太子庶子子譚為黃門郎同時為滕胤所害
後次子譚入晉為祕書監則譚與譚兄弟也
而華母當為融妻矣但云母年十八守節而
譚是時已為黃門侍郎非其所生明矣豈譚

之後母乎母子之分詎容臆斷然松之之世
去晉未遠故家文獻猶存可徵非若貞觀諸
臣收散逸之餘事多紕繆萬歷楊暉吉志直
以為華融之妻可謂有卓識哉

北齊顏女揚州獄吏妻也姿色絕人太守聞而奪之遂
自刎死今相傳顏小娘子塚是也 嘉靖維揚志

按北齊揚州乃在壽春不應溷入況遍閱北
齊史並無其人不知舊志本於何書又云相
傳即顏小娘子墓是中必有推移附會之誤
姑存之以俟考

陳徐母廣陵人徐靈禮妻室焚冒火救其兒與俱焚死
太史劉俊以聞詔卹其家 同上

按陳書南史並無徐靈禮其人徐母事未知
何出卽救兒焚死亦未足風世非若當時賈
恩夫婦救母之棺同被燒死徐普濟居喪鄰
家火起伏棺上以身被之焚炙幾死皆得列
名正史如徐母則情同事異引史之例似乎
可刪至云太史劉俊以聞詔卹其家本傳無
太史字晉宋職官惟有刺史內史長史其爲
不根更可見矣

隋華陽王楷妃元氏者黃門侍郎龍涸縣公巖之女也
巖明敏有氣幹煬帝嗣位坐與柳述連事除名徙南海
後會赦還長安有人譖巖逃歸收殺之妃有姿色性婉
順初以選爲妃未幾而楷被幽廢妃事楷愈謹每見楷
有憂懼色輒陳義理以慰諭之楷甚敬焉及江都之亂
楷遇害宇文化及以妃賜其黨元武達初以宗族之禮
置之別舍後因醉而逼之妃自誓不屈武達怒撻之百
餘詞色彌厲元自毀其面血淚俱下武達釋之妃謂其
徒曰我不能早死致命將見侵辱我之罪也因不食而
卒 隋書本傳

按萬厯志凡列女非郡邑所生雖寒如雪霜
殉節茲土均不錄入此爲失體借如仕宦流
寓中更有忠昭義著豈得限以土著而反遺
之乎況婦人從夫禮也今如華陽王妃元氏
者皆列簡冊若徒以文藝而無節行者汰之
唐樊彥琛妻魏氏揚州人彥琛病魏曰公病且篤不忍
公獨死彥琛曰死生常道也幸養諸孤使成立相從而
死非吾取也彥琛卒值徐敬業難陷兵中聞其知音令
鼓箏魏曰夫亾不死而逼我管絃禍由我發引刀斷其
指軍伍欲強妻之固拒不從乃以刃擬其頸曰從我者

不死魏厲聲曰狗盜乃欲辱人速死吾志也遂見害聞
者傷之唐書本傳

揚州江都李邕妻溫氏因邕以文辭矜肆素輕張說與
相惡會仇人告邕贓貨枉法下獄當死許昌男子孔璋
上書得減死貶遵化尉溫復爲邕請戍自贖表入不省

同上

附表邕少習文章疾惡如讐不容於眾邪佞切齒諸
儒側目頻謫遠郡削蹟朝端不啻十載歲時歎戀間
者傷懷屬國家有事泰山法駕旋路邕獻牛酒例蒙
恩私妾聞正人用則佞人憂邕之禍端故自此始且

邕比任外官卒無一毀天意暫顧罪過旋生諺曰士無賢不肖入朝見嫉惟陛下明察邕初訊責便繫牢戶水不入口者踰五日氣息奄奄惟吏是聽事生吏口迫邕手書貸人蠶種以爲枉法市羅貢奉指爲姦賊於時甌使朝堂守捉嚴固號天訴地誰肯爲聞泣血去國投骨荒裔永無還期妾願使邕得充一卒効力王事膏塗朔邊骨糞沙壤成邕夙心

周迪妻某氏迪善賈往來廣陵會畢師鐸亂人相掠賣以食迪饑將絕妻曰今欲歸不兩全君親在不可并死願見賣以濟君行迪不忍妻固與詣肆售得數千錢以

行至城門守者誰何疑其給與迪至肆問狀見其妻首已在柝矣迪裹餘體歸葬之

同上

露筋女父繫獄無兄弟供朝夕與嫂往省之過高郵其地蚊盛夜若轟雷非帳中不能避有男子招入帳中者嫂從之女曰男女別嫌疑阿家爲誰而可入耶獨宿莽中竟爲蚊嘍而死筋露土人立祠祀之世傳爲露筋廟

女鏡

按江德藻北道記露筋娘者鹿筋梁之訛若此則無其人矣徐文長集云蕭荷花祠卽俗稱露筋娘娘是也故吳嘉紀集又有列女蕭

蕭之說而潘之恒如江草曰貞女逸其姓氏
謬呼之曰全皆不足據當以米海岳碑云澤
國之女嚼膚露筋不就有幃之子氏不顯於
一時祠乃揭於千古為正雖失姓氏而節已
昭日月又何必附會諸說

五代明媪廣陵人先選入吳王宮中吳王嫁牙將李廷
梅珠翠服飾頗極華煥繼姑悉收之媪一無所恨布素
粗澹而已姑箠楚日至毫無怨言或以姑暴酷為說答
曰新婦鄙拙不能奉順耳終不改初志太平興國中郡
守改其里曰崇孝 舊志

宋李氏廣陵人逸其夫姓逾期喪舅姑相夫葬祭盡禮
夫以貿販為業晨出暮歸李必告以毋求不義之財夫
感其言人以為長者淳化中夫亾服滿其家欲嫁之李
礪刀截髮乃止 同上

孟氏揚州人大理寺丞魯有儀妻夫亾守志葬夫親屬
凡七喪元祐間揚守臣以聞封旌德縣君 同上
吳氏臨川人年二十四歲歸布衣王令未及一年而令
卒遺腹一女其兄欲奪而嫁之號泣勿許歸老父母之
家屏蹟田桑以事兄嫂荆釵布素不事塗飾三十二年
在本縣黃池陂獨居掌陂事每歲農隙修治隄堰蓄水

灌田利及一方一方之人循稟教令子弟有不率者自
攜檟楚以求治罪特詔賜絹十匹米十石後以壽終

舊江

都縣志

按舊志載宋史而宋史無其傳惟廣陵詩鈔
小序云王荆公赴召道由淮南王令賦南山
之田詩往見之安石大喜因妻以其夫人吳
氏之女弟令年二十八卒

榮氏疑之女弟自幼如成人讀論語孝經能通大義事
父母孝歸將作監主簿馬元穎建元二年賊張遇寇真
州榮與其姑及二女走維揚姑素羸榮扶掖不忍舍俄

賊至脅之不從賊殺其女脅之益急榮厲聲詆罵遂遇
害 宋史本傳

蔣氏揚州人李易母也易以建炎戊申狀元授僉書江
陰軍判官三年金人南侵守臣胡紉遣將拒敵且諭易
曰吾曹義當死城守君有母宜亟避之易歸告其母母
曰我去則汝必無堅守志死生當與汝同之間者感泣
既而賊知有備亟引去 嘉靖維揚志

按宋史建炎二年九月庚寅賜禮部進士李
易以下四百五十一人及第出身是也楊誠
齋文集云建炎二年上策士於維揚擢胡銓

第一有媚其直者竟置第三而李易之名位
功業不顯故宋史無傳

晏氏臨川晏孝廣之女年十五有美色建炎三年金兵
至揚孝廣為揚尉死之晏為兵所得欲妻之即刎頸求
死金兵感而釋之

明南畿志

按記纂淵海云女為虜所得二十年卒不能
犯胡人皆義之則與此不同明一統志云晏
氏晏殊曾孫孝廣之女而古今貞烈維風什
云晏殊女孫考晏元獻公生於咸平間去建
炎一百三十餘年當以稱曾孫之女為是

歷陽女子徐觀妙嫁張弼建炎己酉客維揚寇至弼往
裕溪避賊徐氏為亂兵所掠大罵曰朝廷畜汝輩以備
緩急今寇犯行在不能赴難而乘時為盜我恨一女子
力少勢弱不能斬汝豈肯為汝曹所辱以苟活耶賊恚
刺殺之

沈俶諧史

按宋史徐氏和州人徐閔中之女但云建炎
三年金人犯維揚官軍望風奔潰肆掠未云
客維揚也是宜以史為信然沈俶亦係宋人
耳濡目染不當訛謬姑兩存之

李氏謝枋得妻也通女訓孝舅姑奉祭待賓客皆有禮

枋得起兵守安仁兵散走閩中元人購捕其家李攜二子匿貴溪山中採草木而食元人下令曰苟不獲李氏屠而墟李乃出就縛送江淮行省拘揚州獄中時將沒入李間撫子泣曰若輩生還鄉里善事吾姑吾不得終養矣是夕解裙帶自經獄中死

舊江都縣志

附李謹思李節婦詩粹粹多抵屈幽幽獨雉經借渠

施粉黛聊與照丹青孤樵何年寄重泉底處局有人

能縮地不隔短長亭

宋遺民詩

按宋史及郭天錫雜記胡頤菴文選李奎陳謝二公祠堂碑記皆云死建康獄中今云死

揚州者必因雙峰胡氏疊山先生行實之訛

耳惟李源道文節先生謝公神道碑最詳云

夫人李氏自縊建康獄中一女二婢皆死之

二子熙之定之移獄廣陵胡氏之誤殆由此

也當以宋史為正

趙淮妾長沙人也逸其姓氏德祐中從淮戍銀樹壩淮兵敗俱執至瓜州元帥阿朮使說李庭芝淮至揚城下大呼曰李庭芝男子死耳毋降也元帥怒殺之棄其屍江濱妾俘一軍校帳中乃解衣中金遺其左右且告之曰妾夙事趙運使今其死不葬妾誠不能忘情願因公

言使掩埋之當終身事相公無憾矣軍校憐其言使數兵輿如江上妾聚薪焚淮骨置瓦缶中自抱持操小舟至急流仰天慟哭躍水而死 宋史

附元劉麟瑞詩石頭城昔號金湯岌岌孤墉戰馬塲西日突圍逃溧水南冠荷校說維揚血凝漢節誇男子身寄秦淮藉女郎千載妾身貞更潔仰天哭向水雲鄉 昭忠逸錄

按江南通志載入江甯想因昭忠逸錄之詩耳但宋史云使淮說李庭芝於揚城下不當有誤烈婦雖死瓜洲事蹟在郡故入甘泉他

若生於瓜洲而死於瓜洲者皆屬江都不並列焉攷趙公二妾一名翠蓮一名綠雲死此者未知孰是

元費氏名元琇上海人歸廣陵朱氏至正間從宦江陰屬世亂歸甯丙申苗軍亂城陷賊見元琇露刃欲犯焉元琇死拒奮罵曳元琇爪入楹間罵愈切苗怒劊之義聲動吳中 嘉靖維揚志

王氏新喻人諱覺善年十八嫁維揚衛桓歸十一年而桓卒節婦惡衣食御之無愠色井曰中饋之事親之惟謹縫紉之勞職之不廢以上有吾姑也故致其養愈勞

地修身集卷之六
而不懈以其失所天也故奉其先久而猶悲平居訓諸子以恭儉待嫺舊以慈愛化女婦以柔順而內外親無疎戚愚良輩者附卑者慕曰可矜法也當桓之亾節婦年尙少父母之家欲奪而嫁之節婦泣曰吾夫旣亾吾不忍卽死者期有以養吾之姑奉吾祭祀撫吾諸子如斯而已他非所敢知也其賢如此至正戊子郡守陳公鐸以事聞淮東部使者姚公紱加察詳焉表其門曰節婦王氏之門 九靈山房集

甯居贊之妻獨吉氏揚州路總管獨吉禮之女也早寡扶夫柩歸葬河內先期挾其幼墓下廬焉哭踊自誓吾

爲甯家婦不得與其夫偕老吾力猶能使子有立舍是吾無所事於世矣卽捐去簪珥盛飾服御取其儉素而以禮自治後子孫皆成立廉訪使嘉其貞節達於朝廷旌表蠲復如令下有司爲大書貞節獨吉氏之門 柳侍制文

集

續志考正甯本河內人先寄吳而後歸河內獨吉禮亦宦于揚節婦內外兩家俱非揚產

翟氏廣陵人僞吳江浙行省左丞潘元紹側室性柔慧事其主及夫人皆能以禮國事日蹙元紹出臨戰一日歸召姬等曰我受國家重寄義當死狗脫有不諱宿戒

若等幸引決毋為人恥也姬七人同日自經死翟氏其一也時年二十三 靜居集七姬墓誌

明管氏二婦揚州人管賢妻闕氏管哲妻馬氏洪武中賢卒闕氏年二十六一子在襁褓且誓誓死不嫁後哲亦卒馬氏年二十一姑以其無嗣諷之他適馬氏曰伯氏能守節我獨不能乎姊妯力事紡績以養姑誓子稍長教之學星卜以資日給姑以天年終併力葬之後二嬪俱年七十餘郡上其事旌為雙節 明一統志
高氏江都人儒生戴和妻永樂中和試不利歸鄉負媿投水死氏每哭夫必慟絕誓不獨生一日盛飾白姑歸

甯乃詣夫死所長號數聲投水死事聞表其門曰貞烈

古今貞烈 維風什

左氏左彥遠女適劉得得為順義尉逾年得卒氏年二

十六歲攜孤扶柩南還守節以終宣德元年旌 嘉靖維揚志

楊氏教諭楊甯女適李鉉鉉亾楊年十九孝事老姑孀

居四十四年知府吳嵩以聞宏治二年旌 同上

盧進士瀚妻妙惠者姓李氏揚州人也盧未第時講學

西山寺中久絕音耗至成化間有同名者死京中鄉人

誤傳盧死父母信之憐惠貧寡欲奪其志不可必強之

於是江西鹽商謝啟聘之惠自縊者再防守者密得不

死既受聘強之歸謝至則操節求死啟不得犯置母旁安馴之母亦揚州惠恃其瓜葛懇請為尼母佯許之意其久可成禮時啟舟先發母偕惠後舟過金山寺下因禮醮惠題詩壁間後署曰盧瀚妻李氏盧後登第承命往江西促憲廟實錄至家則虛室矣頃遊金山見其詩徑抵豫章得徐方伯差一慧隸歌其詩於各鹽船下遂知在謝接至公館權會如初謝商亟嘆曰貞婦也乃置之無夢園集

附李氏詩一自當年折鳳凰至今消息兩茫茫蓋棺不作橫金婦入地還從折桂郎彭澤曉烟歸宿夢瀟

湘夜雨斷愁腸新詩寫向金山寺高挂雲帆過豫章
按月山叢話仰山脞錄皆載其事大同小異
不若此傳之簡而明也

節婦姓牛名妙真浙都閩循之從女也天順癸未維揚薛君寬字叔裕令吾臨海聞其賢娶為繼室時年十九叔裕已逾五望六牛以所事父事之養姑篤婦道姑卒克相喪事叔裕以哀毀致疾牛侍湯藥無分寒暑凡六年及卒哀慟不欲生盡出所藏為殯殮不事浮屠時年二十九遺孤齡甫一歲或諷之曰貴業若此如歲月何又曰熒熒爾身恃此襁負非吾所知也泣曰死吾所也

吾尚饑寒虞哉吾固弗能必吾孤之立也吾忍自絕於
 亾人也哉諷者不敢復言澹然鞠齡以居衣食於織作
 艱苦萬狀齡幼多疾恒視以生死稍長就外傅坐食起
 處必責以禮弱冠為郡諸生克自勵鄉邑人推行誼之
 士必及焉以是牛之賢益彰有司奏旌其門云論曰吾
 觀丈夫克自立必有得於書讀書非婦人事也牛之賢
 若有脗於恆之六五彼手不停編而或愧焉何哉夫人
 所界不在書假以明其蔽耳無所蔽則無所假噫能不
 蔽者幾人哉斯固書之不可弗讀也讀之弗得其道是
 亦弗讀也已齡讀書者也傳其母且以勗齡

金一所先
生文集

揚州二女失其姓氏當北師下揚州二女為眾所窘乃
 給之曰毋甚窘我徐當妻之兵舟東渡大江二女躍身
 急流死

嘉靖維揚志

附高濟詩朔師歷亂空揚州干戈斂躍旌旗愁道傍
 雙立誰氏女窘入師中俘爾囚佯呼配妾勿窘妾從
 容送妾登師舟真松肯隨朝菌萎白璧忍抱微瑕羞
 姊兮誓天當永訣妹兮珍重同生儔素心願蹈東海
 死一躍江腹擊中流須臾羣醜齊破膽此女真為綱
 常謀天樞爾扶地軸繫千古萬古清瓜洲至今父老
 騰口說幽魂時弔長江頭酸風往來自潮汐驚濤怒

浪隨沉浮不須曹娥並立姚江之偉石不須英皇聯
祀湘水之深秋於惟二女堪遠匹日星昭揭同江遊
有司不爾志天子於何求鐵筆莫更勒太史金章莫
更誇封邱還應我詩壽雙節耿耿直與乾坤留

李氏揚州府學生章鑑妻夫亾李年二十四遺孤繼生
甫八月誓死自守事祖姑羅姑朱皆以孝聞孀居四十
八年正德十六年禮部奏表其門 同上

姜氏諱妙慧江都姜暉之女蔡爌之妻當處室時敏穎
迴軼羣兒嫻壺範力女紅凜然以禮自防弟妹中有怠
且嬉者每規以正既歸蔡事舅姑以孝稱宏治辛亥爌

以力田過勞年二十八而卒節婦少夫一歲哀過泣血
病篤亦垂死強之藥乃生或奪其節抱兒哭曰吾所以
不死者有此孤耳吾嫁孤安歸終其身七十八年冰蘖
其操如一日夫死時孤圻始八歲教育備至既長嫻文
詞工六書為名公墨士所器重正德間逆濠變作圻獻
禦賊五策於維揚蔣公瑤嘉靖初御史秦君鉞檄圻緝
武皇南巡實錄尋受知於時宰桂公薦入史館桂罷相
圻為抗疏請皆母訓也天子旌表其門 崔東洲集
褚氏金鑿妻鑿沒褚守志五十年正德間旌表 嘉靖維
揚志
殷氏殷安女也許某氏子為妻未行某氏子歿殷聞計

閉戶自縊死父歸其尸合葬焉 同上

姚氏趙彥良妻彥良解官鈔赴南京遇盜死江中姚具良衣冠至江邊招魂以葬魂帛若有物墜其末持不能起人異之葬畢守節不出中門者六十年 同上

附張以甯詩黃鵠不重適哀鳴常自憐披心當白日

留面覲黃泉寂寂誰能爾滔滔爾獨賢廣陵姚氏傳

史館幾時編 翠屏集

江都陳娥許嫁姑蘇崔生強暴將奪之抱節而死 袁承

附袁表詩二首生存異鄉縣死逝異墳邱單覺違昔

侶雙鳳失今儔願結來生誓還同一處遊 妾顏花

比豔妾命草同彫寶幔塵空積泉台恨豈銷貞魂應不散暮雨復雲朝

陳氏江都周鍊妻鍊故陳年二十四遺孤溥甫兩月兄忠欲奪其志陳剪髮嚙指誓不再適紡績以事舅姑守節五十餘年正德九年以貞節旌門 雍正揚州府志

節婦葉氏江都葉樂菴之女年十八嫁同邑火鉞後五年鉞死節婦枕藉草苫泣血三年或諷以改節葉怒且罵曉之以貞烈大義引刀刺面示不可奪節婦初歸火氏事其姑鄔曲盡婦道每以勤業力本勗夫子待夫之二弟太學生鈞鉉暨諸姑並有禮視僕婢咸有恩生一

子七月而夫卒無何翁亦卒節婦佐其姑治喪如禮事姑益謹教子益嚴子原甫後入太學君子謂葉氏既貞且節且克成其子觀風使檄郡縣以節婦書其門貞節顏其堂加餼以勸其終正德丙寅仲冬十有八日卒年四十有四節婦未字時通孝經爛禮度哀哭父喪孝母扶疾以賢女名既字而多有懿德殆天性云

崔東洲集

按沈鍊青霞公集有火鎬母壽頌序極稱其母儀婦道有古淑人風是鉞與鎬當為雁行不遠暮閨門之內先後相映何揚州火氏之多賢婦也

此禮安人歟

同前寶鼎堂空齋泉台則豈與良哉

曹氏萬廷璋妻廷璋歿曹年十九遺腹生一女其姑憫之命再適曹斷髮誓節至八十二而終編修楊守阯為

立傳

嘉靖維揚志

守節六十三年二月皆無子

胡氏婦江都農家女也失其姓嫁同邑胡生生補郡弟子員性惰廢學遇胡多不以禮尋歿舅姑憐婦少無子將嫁之使其父母往勸不從舅姑詬曰若夫以奴視若奚念不嫁向夕婦遂自沉水死

同上

陳氏劉全妻年二十七夫亡撫幼子章備嘗艱苦守節五十四年嘉靖間知府易瓚為請旌命未下而卒

同上

葛氏臨淮葛欽女適江都王文玉生二女文玉死葛哀

慟臨棺觸仆其母李氏救之甦遂困臥五月歿同上

邱氏適任銘銘卒遺孤淮方襁褓撫之成立淮又故復

撫孫女甘貧守節四十餘年依姪淵以終嘉靖十二年

巡按御史張惟恕旌其門同上

王氏少許聘金珊珊病歿至其家視殮哭泣盡哀服闋

誓以死守晚家落其姪迎養年踰六十猶處子也明南畿志

陳氏李幹妻幹卒陳年十九守節五十八年楊氏李輅

妻輅卒楊年十八守節六十三年二氏皆無子依姪李

彥鐔彥鐔卒妻周氏撫遺孤滋三節萃於一門巡按御

史表其門嘉靖維揚志

袁氏邑諸生張玠妻玠溺死袁年二十九一女甫五歲

一女遺腹撫二女入室矢操四十三年同上

郭氏王軾妾軾卒郭年二十五遺孤奎甫三歲郭孀居

二十五年保孤成立巡按御史旌之同上

張氏攸縣尹張曦女適揚州衛劉杲杲卒無子有顯者

求為繼室力拒不從後家貧歸依母弟年六十七卒巡

按御史表其門同上

陳氏揚州衛王錦妻年二十六而寡守節三十年教子

成立年五十六而終同上

呂氏適廖允修允修客死西川呂年二十二子富方晬

呂育孤孀居四十六年知府孫蕃志其墓 同上

李氏邱儀妻儀早卒李年二十四無子女依其伯俊以

居年踰七十始歿 同上

張氏監生紀世楸妻夫亡時年二十四事姑張氏極孝

撫孤子文光成立守節五十餘年巡按屢旌其門 同上

沈氏廖越妻越卒沈與妾馮氏張氏共守節里中火將

延及其家鄰嫗請出避之三氏曰死則共此室耳俄而

火止 萬曆府志

虞氏諸生張齡妻齡歿苦節撫孤五十餘年嘉靖間旌

表 萬曆江都志

徐氏女許配淮安庠生朱某未行而朱亡女成服於家

聞其殯日沐浴縊死朱氏歸其柩與夫合葬焉 同上

鄭氏名其倫嫁高郵庠生崔士僕嫁三日僕暴疾歿葬

僕前一日櫛沐更衣夜半反戶縊死時年三十 同上

許氏劉昊妻孀居六十年卒子棟滑縣尉繼成庠生孫

惟珍寶坻縣尉人謂天以報許云 同上

王氏賈達妻達亡王與妾林氏俱少林一子王共保育

之子娶婦復天又共撫孫成立姪賈必成亦早歿妻劉

氏年十九撫孤日章稱一門三節 康熙府志

蔡氏歸沈夢麂三年而寡子洪禮甫生鞠育盡瘁五十

增修身縣志 卷之六
年洪禮篤孝嘗藥廬墓事聞建坊旌之仍復其家 同上
孔氏邑諸生葉襄妻姑卞氏病晝夜侍湯藥姑歿號不
絕聲而絕宗黨咸稱其孝 同上

蘇氏太學生汪恕妾生子鑑恕病革蘇割臂療之刀利
自剗透脣負創甚恕病愈而蘇死華亭陳繼儒傳其事

同上

喬氏武舉史良輔聘爲繼室未及娶良輔卒喬聞訃誓
以身殉姑迎之歸慰之曰吾子有孤爾撫之不愈於輕
生乎喬乃依姑以居課子著勲誦讀不輟年六十而歿
直指唐世濟請旌於朝並題曰貞女立碑墓前 同上

附王納諫贈喬貞女序以劍許人猶挂冢樹以身許
人豈復得蓋棺而背之禮曰女子許嫁纓非有大故
不入其門解之曰纓者嬰也示有所嬰繫不他適也
鬚眉男子課其業則誦孔孟比其行則薄由夷一臨
大節反面相負安在許心不移者乎又況於環珞而
曳紉者哉甫以行媒知名其意色則未接也同穴之
誓未有以相要藐諸之孤未有以相託彼自天亡吾
自處子若不與吾事而安者亦鄉閭之所不非也喬
貞女者曷故而執志不遷耶節義一也而男子多惜
名女子多樸誠名譽銷沉則有遷樸誠無悔則無遷

其設誠死義違計吾死之可以捐可以賒其設誠不
他適違計吾處子未玷不妨他適其設誠痛其夫爲
撫其初妻之子違計吾之不登而婦不育而子理之
所寡意固不自怨事之所希有我固可獨有噫嘻其
亦奇矣納史氏幣稱史氏婦始而曰史氏有死婦可
以報地下矣父母姻戚百諭之乃止則又曰史氏有
生婦可以不替其孤矣哀經適史氏哭其柩字其孤
誓以是終雖父母舅姑百諭之不止噫嘻吾未見處
子而嫠者也洵奇矣或曰禮稱一與之醮終身不改
不云未與之醮終身不改余應之曰非常之行不可

以著爲儀然亦微見其意也非有大故不入其門大
故莫如夫喪入門詎止慰薦纓不可解入不可出且
夫許之醮與之醮也何異蓋貞女之父曰世華有庭
訓其許嫁良人曰良輔余戚也武科中雋不祿云大
郡伯旣旌異其事余是以言

初日齋集

徐氏李文元妻適李一載卽孀遺孤方匝月苦節自勵
歷六十餘年

康熙府志

程烈婦胡尙綱妻尙綱嬰危疾婦剖腕肉療之不能咽
而歿婦不食求殉時有身或勸之得男可不絕夫祀因
復食彌月果生男又一年兒殤卽前謝翁姑曰媳不能

常侍奉矣復絕食姑撫之曰爾父母家二百里中胡不一俟面絕婦曰可日飲米瀋一匙以待其父母遣幼弟至婦曰是即可白吾志自是滴水不入口姑向之泣婦勸以無泣徐檢奩中簪珥散家人並鄰媪復日向曾剖肉救夫夫不可救以灰和之置牀頭願附吾左腕以示全歸遂卒 本傳

宋氏年十七歸儀真諸生杜竟登為繼室舉一子葵方歲餘竟登歿家極貧窘日營緝紉以供晨夕教葵方讀書成立 康熙府志

蘇氏張誠妻誠歿蘇守節數十年 同上

呂氏劉與期妻幼刲股救親及嫁與期早逝呂奉姑養志撫兩孤有成年八十五卒 同上

曾孺人兵馬司副指揮楊公九重妻揚州江都人也大父銑總督三邊贈兵部尚書諡襄愍公父涪孺人性莊重勤敏寡言笑初歸兵馬時兩世舅姑皆在曲盡孝謹姑性嚴小不當意輒形于色孺人逡巡蹑踏無以自容必解乃已姑有顛疾孺人扶持日夜在側楊氏世業鹽筴門內食指百人兵馬公好長夜飲賓客盡醉猶留不聽去有投轄風孺人日夜治具不言勞兵馬公早世遺三孤大者七歲小者三歲孺人寡居獨持門戶而先業

自其父豪宕不羈萬金橐幾盡及孺人主世業身親簿計勾稽簡察累萬緡人比之巴寡婦清云自始歸訖寡居歷數十年內外大小皆有恩禮無閒言後離事日壞而孺人之家日削矣又兩世舅姑及兵馬之喪相繼孺人獨身任之祭葬悉如禮其辛勤能事如此孺人三十六而寡砥節三十七年而卒兵備副使馬公驥采輿論上之巡撫御史特表其門 王巖異香集

韓氏丁光復妻夫死韓年二十四誓節撫孤年七十卒

康熙府志

王氏監生謝銑妻銑亡王年二十八竭力奉姑育子織

維以給守節六十一年曾孫九成元孫旭皆列邑庠卒年八十九 舊江都志

陳氏事繼母以孝聞及笄適姜起周三十而寡苦節四十年仲子士望成進士封安人鄒元標為作傳焦竑銘墓 同上

續志考正選舉無士望名或外籍耶

宗氏女訓許婚陳必堯倭寇之變陳遇難女年十八奔喪成服守貞四十年有司上其事勅建坊仍復其家 同上

李氏名如芷王之麟妻于歸八月之麟卒于京邸李扶柩歸以死自誓不食卒事聞建坊旌表 同上

倪氏丁元素妻夫早歿守志不二壽至一百四歲 同上
張氏太學生劉先甲妻先甲早歿張撫孤成立髮經終身 康熙府志

姜氏蕭文盛妻文盛死家貧姑令再醮姜言有姪三月幸生男以承蕭氏祧不則相從九原必不辱吾夫也果生子苦育有成 同上

高氏劉世統妻于歸二載世統歿高年十八守節撫嗣子含章成立年八十卒 同上
馬氏監生于應登妻應登歿馬年二十九遺四子二女撫育盡瘁五十餘年 同上

潘烈女小字芝兒年十四崇禎甲申高傑兵肆掠揚境避亂曠野中一健兒執之女詬詈激怒以祈死兵不忍殺至河干佯為繫履遂赴水死 同上

敬亭集

韓夫人明江都張侍郎伯鯨妻乙酉揚州城破自經死
方氏貢生方復初女歸武舉趙君謨君謨歿方年二十八撫二孤時聰時化於襁褓中姑瞽孝事克謹乙酉城破自縊孫有成歲貢生鄉飲賓有彬增廣生 康熙府志

樊氏汪承祖妻承祖歿氏緝纊撫孤十餘年值兵至以線密縫其裳附井死 同上

游氏陳王之妻王之死氏斷髮自矢撫孤成立揚州破
或勸乘夜可出城游謂女不夜奔況吾孀婦乎偕幼女
投井死 同上

張氏邑諸生周廷德妻廷德歿張撫育孤以針紉自
贍值城破偕三女投井死 同上

吳氏太學生程宇妻乙酉城破舉家匿地窖中閱三日
被獲宇與二子俱死季子汲年十四亦被傷吳挈兩女
奔鄰舍投水死 同上

孫氏邑諸生李正開妻城破孫義不受辱遂先自盡子
昂奇名諸生孫清仁康熙壬戌進士 同上

附唐繼祖書李節母孫孺人狀後二首浮江一馬笑

當年匝月圍城墮紙鳶宗社豈關巾幗事貞魂何意

姓名傳裏將恨血藏遺牒攜得佳兒入九泉老泪關

干多苦雨莫教空擬悼亡篇 歌吹風光競晚春太

平無復見遺民誰將斷脰捐軀烈話向膏唇耀首人

聖代不妨修綽楔清門久矣賁絲綸長笈更剪溪藤續

好遣輪軒次第陳 國朝詩的

孫道升揚州江都縣學生員也繼妻藍氏其弟道乾道

新皆先卒道乾妻王氏子天麟之妻丁氏道新妻古氏

從弟子啟先之妻董氏前妻生長女嫁張靖次日四兒

增修身縣志 卷十六
繼妻生女曰七兒皆嫁古氏次曰存孫女曰巽皆未嫁揚州被兵時孫氏婦女人人手刃繩自隨城破巽先縊死死時年十七藍氏時年五十四矣或曰母老可無死弗聽引繩自縊繩斷墮地不死再縊不死一卒至揮刀斷繩墮地不死兵既去又縊乃死王氏丁氏方就縊會卒至急走匿夜相持至舍後投汪中死古氏亦年五十四守節三十年頭盡白墜井眾止之弗聽遂死有女嫁呂氏生女曰睿時八歲適在外家亦從墜井死董氏居僻室念卒且至以帶繫門樞縊死存病足力疾移井旁墜而死董氏之嫗有祖母曰陳氏寄居孫與董氏同室

及孫之婦女皆死陳氏亦自縊道升長女嫁張靖者再墜井不死得全節自有傳次四兒與七兒嫁古氏者同縊於床四兒死七兒素壯不死強其姑以手扼其喉令氣絕乃死當是時有張廷鉉妻薛氏城破自縊死廷鉉之妹曰五兒遇卒鞭撻使從之大呼曰殺便殺何鞭爲遂殺死張氏婦女殆與孫同光天壤云

王巖異香集

錢女名淑賢丹徒人隨父逃古家于江都與外家卞氏女比鄰相得乙酉城破與卞氏同死而淑賢死猶烈

府志

附雷士俊錢烈女誄並序揚州城破鎮江錢應式女

淑賢死越十二年應式流涕而告南昌王于一寶應
王築夫以女死之狀且曰曩昔死義多有未如吾兒
之烈者也人之自殺者五勿溺熱縊酖吾兒死五物
具焉嗚呼烈矣于一爲銘築夫爲傳乃過余而道其
事持銘傳示余因誄以哀之其詞曰錢氏大姓世家
潤州徙居于揚醫世用售後先繼蹟應式云尤應式
有女身逝名留其女維何女節孔修待年于柩一死
莫救其死維何遭國多難孤城重圍蟻登魚貫礮聲
雷震鳥獸奔竄從容言笑誓死旦旦有刃者刀剗犀
萬段爰淬其鋒就頸靡憚應式奪之光芒電燦有焰

者火烟燎四散爰灼其薪安寢靡患應式撲之閃爍
星爛乃結徽纆引領受絆介馬橫馳窻宰懸斷跪泣
致詞兵近至門有死無二殺身成仁遷延授藥聲吞
色憐藥飲不死庭水清淪赴水淺止解帶繫頸須臾
瞑目竟隕其命秉畀回祿肉骨灰燼嗚呼哀哉莫惡
非死莫好非生生甘如飴嗜不肯捐死惡如虎避恐
不遠舍生取死氣至能然一鼓而竭再則維難相彼
齷齪豈盡無賢臨難慷慨指日叫天揮劍抵掌涕泪
潺湲斃而獲蘇有靦彈冠百死不同義高邱山著名
巾幗君子惜旃嗚呼哀哉

艾陵集

附朱一是長歌行爲維揚錢烈女賦是日適登史相
墓黑雲壓堞江城高飛濤五月冤風號客子躊躇爲
停轍濺濺猶踐戰場血道塗老父泪如泉吞聲能說
宏光年當時兵斷黃河口四鎮通侯印如斗一朝捲
地悲笳動駭散狶狶百萬眾轟轟夜礮燒廣陵將軍
戰死城角崩弱男迎降壯男走紅粉成羣牽馬後舊
城錢女顏如花江南生長江北家稽首啟阿父妾年
當十五甯爲斷頭鬼不作偷活虜阿父驚心阿母愴
爲憐嬌女珠擊掌生爾誰知復死爾死誠可痛生可
耻此時愁霖天欲傾此時橫屍泥血並幽魂吹入西

風裏泪滿中宵聲策聲策聲殘戰爭歇淒涼獨照
邗江月往事興亡安可論霸圖王業今何存長江已
渡韓擒虎臨春結綺尙歌舞趙家不救襄樊圍半閒
堂裏握樞機宏光年間誰竊政充耳莫問揚州信朝
賜金牌召岳飛暮燒鐵索延王濬史相孤忠實可哀
梅花嶺上留荒堆纍纍北邙相向哭李庭芝外有姜
才招魂縹渺葬諸公錢女魂飛一炬紅赤帝唏噓祝
融怒上與皎日光爭互馬鬣空傳封一邱肯教香骨
飽蠅螻烈女識達心更苦豈有園陵保終古廿四橋
邊一望悲上無蒼天下無土

爲可堂初集

增補甘肅縣志 卷十六
兩張氏一江都人爲監生史可學妻一江陵人爲可學妾可學歿兩氏共撫所生子女工自給歷十數年皆成立孫大典大成大儒俱補郡邑諸生乙酉城破大儒之兄大相自縊死大儒衣冠拜辭其父抱兄屍同縊孫氏諸生張靖妻乙酉揚城破孫見執不屈一卒怒將刃之已及頸憫其老而止復與一鄰婦俱匿數求死鄰婦止之越宿鄰婦又執去孫死志益決墜井若有負之者不死有被俘者過聞井中人聲俯視之孫急以頭沒水眾識之曰母老何患軍中惟索少者耳因以繩引而上藏之破屋中留飯食之去居二日兵復至孫又投井

忽數卒至垂絙下視曰老婦頭已禿何畏爲復引以上一老婦爲易衣遂不死後十六年卒二子瑾琬瑾舉於鄉琬食餼學宮 同上

程娥諸生程煜節妹未字城圍以死自誓與叔母劉約各以大帶置袖中城破文理髮更衣再拜別其母遂縊死劉有女甫一歲啼甚慘劉乳之復以糕餌一器置女側乃死劉妯娒鄒氏胡氏亦同死女之祖姑適林者投井死姑適李者遭掠給卒至井傍大罵投井死時稱一門六節 本傳

蕭氏諸生韓默妻揚州城破時默墜井死蕭氏謂子彥

超曰汝長子父死當隨左右彥超曰諾亦墜井死蕭氏乃投纆于梁立視長女就縊既絕乃抱幼兒魏乳之既乳置兒於地整衣拜老嫗曰韓氏一綫惟此而已善撫之俾韓有後汝賜也必冥祐汝乃自縊王巖異香集

丁氏字景姒丁半千之女幼通經史知大義適文學薛友龍舉一子遭亂龍死丁攜子明遠投晉井中家人引之上明遠已死丁曰吾縊而上者為存薛氏孤也孤亡吾何生為復入井死康熙府志

瞿姑貢生瞿之秀女許字文學焦賡泰未嫁城破請於父曰子處子也倘強暴見及死悔晚矣遂自縊同上

鄭氏郡諸生吳爾成妻兵部鄭元勳妹也事舅姑孝謹甲申鄭奉姑避亂吳門其兄僑寓金陵迎鄭歸甯辭曰吾甯與姑同患難忍獨處樂土也繼返郡遭兵投金魚池死同上

蕭氏趙時雍母姚氏雍妻乙酉城破時雍自刎死其母及妻並二女俱相繼自縊舊江都縣志

楊氏歸諸生曹復彬城破復彬中創仆地楊匿破屋中長女倩文年十四趣母決計次女倩紅年十二請更衣死楊止之復彬執不可乃為三纆次第而縊本傳

甯氏歸李蘧甫三月蘧死於兵甯蠶績易炊以養舅姑

苦節終身 遜弟 薊妻 王氏 遭難死井中 薊弟 其妻 彭氏 生一子 方在襁褓 其早世 彭泣守一孤兵至 自刎 有老 嫗救之 傷喉不死 見者憫之 順治五年 御史李嵩陽旌 其家 康熙府志

馬氏 宋朝相妻 城破 率子之儒妻 張氏 次子之俊妻 馬氏 避舍後 小屋曰 我為宋氏婦 三十年死 分耳 汝輩尙 少 各有母家 以不舍我故 至此 兩婦抱姑 嗚咽握手 連 袂共赴河 死後之儒 登順治己丑 進士 同上

續志考正張氏後複出

張氏 江都人 歸史著 馨年二十六 而夫亡 後城陷 撫其

子泣曰 嚮也撫孤為難 今也全節為大 兒其善圖 吾不 能顧矣 遂赴水死 橫雲山人明史稿

經氏 揚州人 生有至性 濟甯楊諭德 士聰聞之 禮聘為 妾 諭德卒 經守節 撫孤 歷盡艱苦 殆人所難能者

附汪懋麟 楊節婦 經氏 傳節婦 姓經氏 揚州人 生而 穎淑 嫻容 止幼 稟父訓 聞說貞女 順婦 諸節 烈事 傾 耳以聽 性至孝 以多病 養舅 家思父母 輒廢食 其母 抱危疾 臥床 久手調藥 進粥 不少 倦左 諭德 濟甯楊 公士聰 遭甲申 流寇之亂 弃官 南下 過揚州 以憂憤 致疾 獨坐 旅舍 郡守任 公民育 公同年友也 憐公旅

增修身果志 卷十六 三
病無一人侍藥者爲出俸錢聘歸於公時年十八公
病少間攜避蹟吳越間當是時亂兵四起盜賊乘間
劫掠夜伏小舟冒風雨白刃屢窘困絕食而公方羸
弱扶侍左右藉其力爲多尋之常州間郭外有方坐
里者地最荒寂公曰方坐者方外也是可以隱遂卜
居村有小樓公日夕坐其上每北望故鄉眺京闕傷
國事壞於朋黨門戶君子莫能救遂棄家室絕意榮
進自放於荒江草澤而鬱鬱深痛病且不忘輒泪下
數升氏婉轉承事必勤必敬見公悲憤亦掩涕不能
止未幾公卒氏年二十一有子三歲矣公遺命槨葬

此土示不敢歸窆窆其志可哀也氏卜地爲塋兆將
葬公誓與遺孤守墓側而公諸嫡子來言歸葬便卒
歸其鄉氏痛哭重違公命乃與遺孤留葬公衣冠里
中曰公雖歸其神猶在方坐也自是毀妝蒿簪布裙
閉門課績每寒食提遺孤洒酒墓側辟踊號痛墳土
盡濕聞者哀之氏教其孤嚴常語人曰兒先公所愛
教苟無成未亾人何以歸地下也孤旣長力學能文
章揚州府學生名通佺娶常州陳氏孫二人氏嘗一
歸濟上省公葬處曰余識此他日從公歸也及還常
州一年遂卒時康熙十六年三月十一日時年五十

矣論曰婦人之事人猶臣事君然概責望天下之為人臣妾者亦難矣當諭德弃官自放非有顯榮富厚也固甘心從公於流離困苦之時卒少寡三十年以死以視委身事人享非常之榮一旦易面改節者何如耶揚州俗恒以女子遠嫁率以靡麗輕之豈知有持大節如此者余受知真定大司農梁公公實出諭德公門諭德公子持狀涕泣屬為傳不敢辭也

百尺梧桐

閣集

謝氏邵允謙妻城破允謙為亂兵所害謝聞即蹈火自焚死

康熙府志

沈氏宋朝柱妻城破欲自縊慮不即死投舍後河中死

幼女十一歲亦自溺焉

同上

蘇氏倪士俊妻蘇光達之妹也士俊死蘇年艾無子乙

酉揚城將破蘇具酒楮奠其夫曰吾久欲死所不即死

者為服未除也今不可待矣遂投井家人縋之起翼日

復投井死

同上

賀氏歸王某夫亡子亦先歿遺孫二陽甫三歲值亂攜

孫避地村落聞不火食常至彌月人咸服其苦節

同上

張氏幼字高魁未嫁魁為亂兵所殺張年十三至魁家

成服踰年城破張抱魁木主自縛呼家人縱火焚之其

姑及二小女一青衣俱赴火死其翁高自遇亦躍入烈

燄中

同上

史烈婦者湖廣參政啟元之女姪也適邵伯鎮人馮上銓甲申高傑兵駐揚州縱兵四掠烈婦避居田間會五月五日姑欲攜幼子並烈婦歸烈婦重違姑意隨姑行傑兵突至欲犯之烈婦給以取金遂躍河水死直立水中面如生烈婦姊適王聖明嫁未三月夫卒時年未二十守節凡六十年而卒

同上

邵氏牟君寵妻奉寵母以居

大兵至以子付寵曰聞

兵不殺佛子可將此子爲沙彌以存牟氏一脉我與姑

存亾與共也君寵攜子出邵佯作腹痛須熱水熨之其姑往熬水邵乃解所繫縲截爲二分左右上下懸之梁自就右而下者縊焉姑得熱水至邵已絕見左纒曰此待我者也遂投入同死後兵入買二櫓殮之乃卽其外

甥也

同上

鄭氏女侍御爲光妹也幼字諸生程起善起善溺死女聞飲泣數欲自盡父母見其志不可奪乃歸之程氏爲立嗣子值夫忌泣奠絕糧而死年十七御史李嵩陽旌

之

同上

夏氏汪應英妻應英休甯人授徒江都客安東以死夏

適應英甫一載聞訃哀慟水漿不入口七日而死 同上

劉氏年十四歸史載筆十二年而夫卒家故貧撫孤大

成大誥紡績以供薪米年饑衣食弗充守節無二乙酉

城破大誥受重創劉持之泣有卒見其髮皤然聲哀慟

以一旗置其門遂獲免孀居五十三年年七十九而歿

同上

程氏朱元德妻嫁甫逾年夫歿視含殮畢即投繯死有

祠便益門 同上

王氏井達妻乙酉城破掠於兵與所生小女分散囑同

難鄰婦曰汝見吾女乞代我推之水中乃自刎 同上

卞氏庠生范駿妻施氏駿妾卞年二十六施年二十四

駿亡各有遺腹各生一男卞守節三十三年施守節六

十二年歿 雍正江都縣志

許氏袁秀甫妻乙酉城破氏闔戶自縊 同上

張氏卞時瑗妻乙酉 大兵至瓜洲高傑欲遁縱兵掠

城內氏懼辱自縊未絕復趨水溺焉劉氏卞時璧妻亦

自縊鄰婦解之復自刎死 同上

夏氏尤世澤妻乙酉城破氏避兵入文廟東廡即自縊

子國士庠生 同上

姜氏黃士擢妻乙酉城破氏於其室為兩縊先命十歲

女官姐投之俟其絕乃投一縵死 同上

王氏諸生史袁妻乙酉城破氏欲死袁止之曰吾聞有令不殺王曰焉有城破而不辱婦女者乎遂抱子投水死 同上

鄧氏周再竹妻乙酉城破投井死 同上

王民生員尤時中妻乙酉城破王氏於室中爲兩縵呼女曰汝年已十六苟活卽辱矣令先投一縵俟其絕乃自縊 同上

邵氏尤守常妻乙酉城破攜七歲女匿複壁三日乃出見血流屍積遂慟哭墜樓腦破足折女扶臥於床未幾

蹶然起謂女曰夜夢汝父爲我治足已愈矣乃步出城三里至祖墓拜辭投塘水死守墓人以葦箔裹之葬祖墓側後子世傑歸具構改葬有藤纏絡箔外厚數寸不可剗乃止 同上

唐氏監生李文炳妻孫氏文炳妾唐年二十五孫更少俱寡繼一子亦夭乙酉城破唐與孫俱投宅傍一窪水死週身衣皆密縫焉姪孫上妻郭氏亦守節四十餘年 同上

王氏江都張綵妻年二十九綵死苦節至七十五歲卒巡按御史表其門 同上

劉夫人失其姓總兵劉肇基妻肇基提兵赴宿遷留眷
屬於高郵夫人與訣曰設有急君以死報國吾必以死
報君及肇基奉督師檄援揚州以巷戰死夫人聞信卽
慟哭自縊同上

續志考正總兵遼東人夫人殉節高郵非在郡城
張氏秦之蒲城人配揚州史似蘭性端謹不苟言笑相
夫力學夫早亡矢志守節乙酉大兵破城氏哀號拜辭
夫靈投身宅後潭中子典甫十齡隨躍入水遇救出得
不死及長念母遭難衣不縵服食不美味數十年如一
日刊追遠圖以紀其事京江張玉書爲之序本傳

韓烈婦不詳其何氏歸于韓居揚州之大橋年將三十
有殊色城破爲兵所得剝其衣將污之婦弱不能制上
體已裸止存一裊乃給之曰若必欲于眾前辱我雖死
不可曷至內室隱僻處當從命耳兵喜隨之行不爲備
婦故迂道至糞窖躍入其中沒其首兵以穢不可復近
大怒亂箭射死之雍正揚州府志

揚州女子遺其姓聞兵至投入河中死遺詩一首有江
靜猶堪沉弱質月明誰與弔孤魂之句同上
王氏江都錢禹錫妻城破時夫奉令守城氏以六歲子
溥拜屬其僕錢成護之兵遽入逼氏不從鞭之無完膚

增修甘泉縣志 卷十六
會日暮兵還營乃匍匐投宅後汪中不死其翁至授以竹竿拉之上氏徧身水血淋漓哭拜翁曰幸未辱身今請面死遂自縊錢成負溥乘夜走匿北鄉復入城迎主遇兵被害 同上

朱氏景自潤妻高傑兵掠邑東鄉入潤家欲犯朱氏氏大罵不屈遂被殺自潤妾王氏賊強挾之上馬出門躍下觸槐死賊復斷其頭去 同上

常氏字景于忠而未嫁高傑兵入其室氏在爨下執一鐵叉拒之叉方熾賊不敢近既而叉稍冷賊直前逼氏氏舉叉擊賊傷頸賊亦砍氏斷其臂後仍歸于忠偕老

以歿 同上

羅氏庠生史著直妻乙酉城破羅自割兩耳投宛虹橋下死 同上

郭氏瞿之後妻乙酉城破舉火自焚死長子存直早歿

婦姚氏年十九矢節至年八十次子維新亦早死婦蕭

氏年二十二矢節至八十有三 同上

吳氏閔德祚妻乙酉城破德祚遊學未歸氏以兩幼子託老僕婢持去將投門外水中會兵猝至欲犯之不從加以刃被七創仍投水死 同上

吳氏庠生闕荆門母同荆門妻王氏妾唐氏俱於城破

增修身縣志 卷十六
時自縊 同上

何氏錢肖林妻乙酉城破肖林死氏年二十七有子邦

華七歲懼辱自縊 同上

王氏胡天生妻乙酉城破走入後魚池抱石投水以死

同上

馬氏孫顯吾妻乙酉城破投井死 同上

李氏羅仁美妻乙酉城破氏與嬸劉氏妾梅氏李氏女

宦姑婢菊花同抱薪積樓下舉火登樓焚死時仁美已

刃斷二指定後尋收遺骨聚一處瘞之 同上

附方苞羅烈婦李氏墓表烈婦姓李氏浙江龍游人

江都羅經甫妻也幼通詩書繼室於羅前子曰都六
歲女曰宦姑年十有二烈婦生女始期揚州圍急烈
婦謂經甫曰君上有母下有稚子都妾生而存則慮
有所牽吾自擇死所以薪積樓下未幾城破市人驚
呼曰兵入矣烈婦上堂泣且拜曰吾不能復事姑乃
別其姒劉氏及經甫妾梅氏李氏時烈婦有身八月
矣抱幼女持宦姑而語眾曰吾多見古書中婦人遭
亂而求生者忍以身試乎眾皆哭從而登樓者凡十
人命一婢下舉火火發亦奮身躍入兵定後眾骨籍
籍惟婢一足尚存始經甫計猶豫未有所決俄而烟

塵蔽天鼓中聲如亂鼓乃搏膺而呼負母挈子以奔卒皆免家復起子孫盛昌都之弟國垣有子曰懷行四方遇文儒輒流涕述烈婦事而求籍焉同命者十有三人劉氏梅氏李氏外惟婢得其名曰菊花其六人者無聞焉焚宅在新城廣儲門內樊家園合冢在隋西華門故城址琅玕王澍書

趙氏薛文甫妻年二十一值兵文甫被傷氏恐汚自縊墳在興教寺前同上

顧氏卞日輪妻夫早亡氏守節撫孤乙酉城破氏自縊樓中同上

湯氏虞啟元妻生一子鴻漸乙酉城破夫亡氏乃置寶玉懷中曰吾愛其瑩潔無瑕也又懷書契曰吾不欲亡先業也遂投井死時年二十其後鴻漸早歿妻崔氏亦撫遺孤守節凡三十八年同上

賈氏生員劉師晏妻會兵至師晏遠出氏投門外水死同上

車晚英諸生鳴鑾女許字甥李之珙及兵至之珙被難時女隨祖官太平署聞訃絕粒死同上

惠氏李友槐妻友槐早夭氏矢節撫孤兵至自縊死弱女甫十歲先自刎不死復縊於母旁同上

增補古身縣志 卷十六 列女

史氏張國華妻乙酉城破夫挈子出避史乃籍薪坐其上縱火自焚死同上

柳氏李榮芳妻乙酉城破氏自焚子綦歸見其母焦灼待斃猶張目曰汝勿號我死為名節也目遂瞑同上

余氏周士獻妻值鼎革夫遠出氏曰姑老子幼何敢死然懼傷名節乃自縊同上

常氏適孔某兵至被掠氏藏利刃衣袖中自刎死同上

吳氏羅先聲妻兵至自縊死同上

魯氏張嗣祥妻乙酉城破先一夕氏同媳桑氏及家人以薪堵門舉火自焚死同上

吳氏羅震初繼配乙酉城破氏自縊死同上

吳氏汪履吉妻乙酉城破投廣儲門河死年二十五歲同上

閻氏舉人劉有學妻婚三年而寡氏撫嗣子鎔龍補諸生未幾鎔龍逝妻張氏孝事孀姑乙酉城破張引剪自刺不即死縱火自焚亦不死以絮蒙頭死水缸中閻氏

守節六十三年歷年八十有二卒同上

續志考正選舉文武舉人中無劉有學

杜氏褚拱辰妻乙酉城破兵入室掠之去氏抱庭前槐樹不肯行兵曳之不動亂刀砍之既死手抱樹尙牢不

可解收者異之 同上

車氏庠生李友桂妻顧氏崔氏俱友桂弟婦乙酉城破

同日闔門死 同上

戴氏仇三捷妻守節六十年 同上

青年寡居白首全節者有金鍊妻陳氏蔡京妻蔣氏許

鑿妻周氏周鑾妻鍾氏羅爵妻王氏張瑤妻杜氏高第

妻嚴氏俞采妻周氏妾火氏孫鶴妻沈氏胡宗洛妻李

氏卞景妻高氏張應麟妻盛氏黃震妻高氏楊炫妻王

氏劉琮妻涂氏 同上

吳氏休甯孫遠慶妻遠慶徙家揚州吳氏無子生一女

遠慶早死吳氏時年二十餘家貧以女紅給衣食揚州

城破吳氏已寡居三十年女既嫁亦生女年十五六矣

宅近井吳氏趣其女入井次及其女乃從容自投入

先是井有人水淺不死其女母子相謂寒甚吳氏給曰

須臾兵去即起矣其女母子死吳氏久乃餓死井中 艾陵

文鈔

錢氏卓文伯妻乙酉城將陷與適王氏姑並小姑三人

皆躍入池中死

附魏世倣書卓母節烈傳略後文曰嗚呼子讀卓子

子任節烈傳而多感矣夫致死亦甚難哉且有幸不

幸焉匹夫匹婦詈而相諍有擱然沉淵茹鳩斷脰雉
經者矣至於忠孝節義所在往往濡忍臆縮污身易
面而不能自引決或萬死一生必不能徼其寬宥猶
且屈膝求哀而究莫可活嗟夫死不死何其大幸也
然不死者又非盡甘心污辱亦有有其力而不足以
自達爲威武所奪一失足遂終爲不忠不孝之臣子
不貞之女婦此所謂致死之難有幸不幸矣蓋非其
志素定者不能今觀卓烈婦錢氏於揚州城未陷時
謂其夫文伯曰城必陷吾盍先死死當與稚子俱君
無累庶易脫耳文伯止之曰吾籌之熟矣於是城將

陷時姑適王姓者少寡亦在烈婦顧之曰盍先諸遲
恐弗及遂抱幼子躍入池水中姑大慟從之夫之妹
二人亦相掖投池水小叔三尙幼昔撫於烈婦烈婦
死環池哭亦躍入水凡八人嗚呼盛哉魏生曰烈婦
固未爲不幸也子從家君子過高郵讀父執王克承
先生所紀崇禎遺錄甲申之變天子殉社稷當時臣
民婦女死者不可勝紀或一室而數十人乃今四十
餘年猶不得載之史冊傳天下獨野史氏藏之其未
聞而湮滅者尙多也吾意揚城之陷亦有如是今卓
氏之節烈歷歷可稽而其猶子克自樹立廣知交傳

其事以布諸海內名碩著之文與歌詩烈婦其必傳矣
魏昭士文集

李節婦不知其姓並失夫名乙酉夏兵陷郡城婦被掠掠者百計求近不能屈越七日夜聞其夫沒婦哀號撞壁顛碎腦出而死時掠者他出歸乃怒烈婦尸剖腹取心肺人見者莫不驚悼咸稱李家娘云
陋軒詩集

饒氏揚州李璘妾小家女乙酉城破投水死之

附劉城饒氏傳揚州諸生李璘妾也幼慧粗知文字以早失父獨依母居遂習聲歌恒悒悒不樂形于愁嘆生見而異之氏謂知己曰甯爲夫子妾遂決意歸

生布衣操作唯謹家人咸稱焉乙酉四月大兵薄揚城氏卽爲必死計周身衣密縫紉不可解迨城破望見鄰家火有婦女羣走聲遂與母俱投室旁汪中死時生方僧服避他所越數日始出之汪中與母屍相抱不脫云劉生曰始余遊維揚與李生交甚善生非徒文士殆肅然貞節人也乃一見饒而悅之意饒芳烈之概有以深感之歎當饒欲歸生時生之戚屬多方尼之生卒致之無黃衫客古押衙之助而竭誠厲意以成饒志生蓋不負饒者饒臨難致命不辱其身有以哉或曰不尼女之死以成其節其母亦賢也或

日饒致死不棄其母非但云烈孝亦至焉嗟呼饒之死備數善矣作饒氏傳

張氏揚州宋之儒妻乙酉城破赴水死

附雷士俊書宋貞婦誅後人之所難莫甚於死今夫人飲食寢處安甯無恙也苟遇醫者切脉望色期以必死則艱然終日不樂人壽考雖至八九十歲一朝病革將死顧其妻孥涕泣沾襟夫有疾而死事之無可逃者也以無可逃之事在我誰肯棄生全之樂而就死傷之慘乎此齷齪之徒所以包羞忍垢而有覷相視也唯學道者然後蹈鋒刃赴水火而不辭何也

學道則知輕重君父之倫重一身之患輕其講之已審一也學道則具大度淡於禍害雖烹醢殺戮不動其心二也有此二可死故死不足爲之難也至於閨門女子與夫猛將悍卒目未覩經史躬未親師友而臨難慷慨舍生取義所謂天授非人力者乎此宋貞婦之死有足嘉而吾友張問達誅辭之所以作也貞婦江都宋之儒之妻問達之妹也當大兵圍揚州貞婦在圍中城破貞婦恐不免於辱以幼女授之儒投諸水自赴河而死其節婦炳蔚天地間問達反覆論述揚美悼窮一唱三嘆者問達善讀書少卽與余

學為古文凡序記志銘自問達為者多有法度可觀
 嗚呼揚州城破女子之死者頗有姓名不著遂以泯
 滅零落余甚惜焉貞婦得問達乃彰矣余讀貞婦誄
 而有感故備言之以見貞婦之節烈不可沒而貞婦
 之有問達亦貞婦之幸也順治戊子春三月逸民雷
 士俊書于莘樂草堂 艾陵文鈔

國朝張氏林廷棟妻年二十三而寡遺子中桂年六歲姑
 衰老織紉供朝夕姑歿竭力營葬教子經史子順治乙
 酉舉人授韓城令奉母往每誠為清白吏年逾八十卒
 雍正江 都志

程氏職方鄭元勳繼妻元勳被難程年二十三號慟攜
 五歲兒于戎馬中請得倡亂者誅之事平長齋苦節歷
 五十九年年八十一卒 同上
 郭氏顧文煥妻乙西城破煥殉難氏年二十二撫孤堅
 守顧氏賴之以存卒年七十餘 同上
 王氏邵伯戴珂妻珂早逝遺孤襁褓且多病氏年二十
 四抱子泣禱誓與子俱存上同後教子有成年七十有七
 汪氏江都諸生蘇光達妻性端嚴通書記光達死囑汪
 曰吾賈志歿牀頭書以遺吾子庶竟吾志汪泣許之歷

三十年足不越戶限日傭紉以給薪米餘市紙筆以教其子字宇作文必授版坐几側文成取視一不中則涕泣罷食宇由是力學知名同上

李氏汪如江妻幼失父母事舅姑惟謹乙酉揚州圍氏慷慨指樓下井語夫曰此畢命處也及城破遽赴井兵既去家人以縋縋出之竟不死課子耀麟懋麟皆以文行著氏茹素五十餘年封孺人以壽終同上

葉氏侍郎葉相孫女也年十九歸徐立政甫期歲舉一子立政早逝家故儒素葉養姑撫幼苦節四十年同上閻氏羅維卿妻方伯閻士選女也氏年二十維卿亡無

子返依母家或勸其改操毅然謝之兄汝伯嘉其志以

幼子爲之嗣母子窮苦相依四十餘年卒同上

程氏汪潛蛟妻年十九潛蛟死遺孤五月乳絕以粉糜哺之不食氏泣曰吾不卽死望孤長成今無乳孤必死是天欲絕吾也以頭觸柱流血乳遂涌守節五十年訓其子成立孫洋食餼有名同上

姜氏夏起魁妻氏年十七歸起魁閱十載大兵臨揚起魁從高郵歸至東關被難遺一子應乾甫九歲氏乃蠶績撫孤苦節四十餘年同上

薛氏郡庠生于天佐妻事姑舅盡禮生三子一女甲申

兵亂天佐卒于旅氏于流離中備嘗艱苦教子成立上同
殷氏蔡天琦妻兵亂蔡曰若苟得免幸保我遺孤天琦
果死殷承夫志苦節六十三年 同上

董嫗諸生韓默家老婦也 大兵下揚州默夫婦及長
子俱自盡惟幼兒魏在襁褓默婦預乞嫗護持之嫗泣
諾懷兒匿死屍下祝曰韓氏不絕其無啼兒果不啼事
定嫗育魏成立將婚媪年已八十且病篤輿至新婦家
曰郎君才人幸勿以貧易之歸遂歿魏入太學以詩文
名設嫗主如母焉 同上

李氏劉有恒妻劉卒李嘗散粟濟貧孫長發成進士李

猶布蔬勤劬年八十終 同上

黃氏佃農王華京妻生二子長十歲次七歲華京死族
人欲嫁之時伺其隙氏謹飭無可乘族人謀于土豪約
日強娶之其晚哭拜夫靈遂自經 同上

朱氏陳端木妻陳墮水死氏守貞五十載敬事孀姑至
老三子三女皆婚嫁長子炳食餼于庠 同上

劉氏高孝行妻乙酉揚城破孝行爲兵掠去而父兄橫
屍在室劉守八日始得棺埋故塋孝行竟不返劉積勞
病癱瘓十五年卒 同上

張氏陳楫妻楫嗜學早歿氏欲以身殉鄰婦防之無閒

一夕婉言遣鄰婦歸縊死夫棺釘上次日眾鄰婦見屍聚哭爲置棺殮合葬焉

同上

高氏進士策女年十八適曹啟元甫一載啟元歿遺腹生男族屬欲利其有百端搆覺氏不爲動保護遺孤成立養孀姑至孝守節數十年

同上

于氏貢生程浩繼室年二十嫁時浩已得疾侍湯藥閱四十餘日浩死氏撫育前妻之子以佶及孫熾昌皆入學苦節四十餘年

同上

張氏名啟汪汝萃妾萃死無子兄汝蕃以子楫嗣之氏與嫡王氏素不相能母家媼姥以氏少年勸之嫁且曰

主翁立後異日縱昌大於汝無與也不應其母將強之氏大慟欲自殺母自是不復言年四十楫爲諸生有聲稱觴盡一時名士氏召昔時媼姆謂曰諸君皆爲妾來主翁有後於妾豈無與乎女不再適非爲名也汝曹嘗謂我守此無名今日聊相正耳聞者莫不嘆息未幾病卒

陋軒詩集

鄭氏江都人適金世珍僅彌月卽沒鄭年甫笄內外咸欲奪其志鄭曰舅姑在夫死孰養已而亦相繼歿立猶子俊生爲嗣教之有成曰吾可無愧地下矣年八十餘卒有司旌之

康熙江都志

朱氏江都太學生湯德化妻年十四歸德化姑歿事翁敬養有禮未幾德化又亡遺孤肇修甫四歲氏備歷艱苦撫之成人長補庠生朱年踰六十孫彭年康熙丙辰進士 同上

裘氏庠生狄崇謙妻乙酉崇謙遇難裘時年二十一歸甯杭州後回夫家守節歷五十二年歿 同上

程氏顧愷臣妻年二十七寡撫子孫成立至八十四歲終 同上

顧氏諸生盧日升妻夫死氏年二十八勤教遺孤英後英以康熙丁巳舉於鄉 同上

宋氏邑諸生朱萬昌妻萬昌早逝氏躬操織紉課子成立 同上

葉貞婦字汝兼少司徒相孫女幼讀孝經列女傳通其義適文學李森早世無子嗣兄弟之子為後冰蘖數十年龜手繅紉以所積葬翁父老無子操針不輟得直以佐父甘旨人稱其節孝咸備云 同上

任氏凌思賢妻思賢死泣血三年殯葬成禮隨自縊死 同上

洪氏太學生吳允良妻允良亡撫孤蓮成立茹蘖衣鶉苦節三十年 同上

高氏李和妻和歿氏守節撫孤以織紉易饗煨茶苦伶仃六十載操作如一日 同上

沈氏光祿丞郝璠妻璠卒氏年二十六子士儀方幼氏矢節撫孤乙酉高傑兵擾揚州氏挈孤避江南獲免勁節歷四十五年歿士儀字羽吉博學篤行著有損齋集

同上

孫氏增廣生朱紱妻紱逝孫苦節三十餘年紡績以教三子俱補邑庠生孫後病篤子夔與麟同禱於神夔割乳麟剖臂以飲母立愈兩子竭力以營甘脆四十貧不能娶先是紱割股救父紱長子京割股救紱至夔麟凡

四見里人紀其事為節孝合傳

同上

程氏姚曠吾妻曠吾死遺孤三歲程年十九撫之成及生孫而子死程又撫孫孫亦死撫孫女出嫁煢煢五十年備歷艱辛年八十依孫婿焉 同上

卞氏丁昭朗妻朗死卞氏二十七遺孤在抱家貧數米而炊守節六十年歿 同上

陸氏張學周妻學周死守節五十年 同上

王氏黃恩賜妻夫早死家貧孤弱撫子有立苦節五十餘年 同上

金氏陳嘉誼妻十七嫁十八孀育子奉姑竭心盡力終

增修甘泉縣志 卷十六
身茹素守節五十八年歿乾隆二年題旌
周氏生員趙自新母苦節五十餘年舉二子自新日新
俱早世長媳姜氏事孀姑撫教遺孤延吉延慶成名次
媳巫氏無子年僅二十餘同守志奉姑一門三節閭里
稱之 雍正江都志

李小妻者何江都張氏四姝宜黃令李君應高之妾也
姝之父揚州衛籍緣鼎革家漸落當歲歉斗米錢二千
其家斷炊烟者已數日姝誓鬻身以活父母方允志已
決適宜黃令李君乏嗣李父時爲兩淮運判藉友人以
禮爲媒由江都載入宜黃官廨未幾若翁下世李令奔

喪廣陵挈家至浦口或勸姝從之東下歸甯父母姝曰
奔喪大故也妾若與俱將不畏多言爲尊君累李令遂
赴喪姝隨其內子徑歸解梁已而李令扶櫬歸里又二
年病且篤姝誓以身殉家人防之頗密遂不言死舉止
自若忽于殯李令之先一夕閉戶自經時康熙二十三
年甲子十有一月二十六日年甫一十八歲先是姝幼
卽聰慧能默誦女孝經女訓亦頗知書法旣歸李令不
復言及次浦口始一索筆札以寄父母書有云他年魂
返江南路唯聽春山哭杜鵑卽是兒魂歸時也聞者泪
下時家人有窺得者驚異亦以爲粗知文墨究未知其

深也嗣後復絕不經意於此既死家人僅知其志行剛烈而已其事李令也敬其事李令之室人也有禮其才識又善韜晦其視死也如歸比萬州牧綽楔旌之鄰里亦題其門後九年予守茲土又七年予兄子世棟從江都得聞其事以書報予嗟呼晚近之世舍身取義之事不槩見於男子亦不多見於婦人而僅見於姬妾者流良可慨矣雖然不猶可為末俗激勸哉因為之傳江辰六文

集
許氏邑廩生李元中妻年二十元中亾遺孤襁褓矢志守節孝養孀姑甘貧教子五十年子銘鼎銘岱皆有聲

庠序

雍正江都志

許氏歸吳興宗年二十七而興宗歿遺一女二子皆數歲姑程氏祖姑湯氏皆孀老家貧甚不能具甘旨許織紉紡績以養及歿殯葬皆如禮撫子女有成食苦茹荼四十五年卒年七十同上

顧氏適諸生盧喬新喬新歿糲食絺衣課六子有成其幼廷簡順治乙未魁武闈第一顧八十終同上

閻氏布政閻士選女適庠生郝雲龍李氏中丞李植女適雲龍弟承龍雲龍年十九卒承龍繼卒閻氏年十九李年二十五共誓栢舟五十年如一日郡邑咸旌異之

同上

羅氏曾襄愍公會孫士汾妻初姑疾剖左股療之既而夫病復剖右股夫亡遺孤恂甫十歲家甚貧冬常衣葛無寒苦色子長娶婦吳氏未幾子又亡遺孤孫纔二歲姑媳同訓之成立備歷艱苦七十七歲卒 同上

楊氏劉萬妻萬歿楊時年二十撫孤植節歷五十年孤應元娶婦張氏應元亦早歿張守志如姑而事姑惟謹生子士隆娶婦王氏士隆又早卒王亦守志不移三世皆以節著士隆子肇鏜康熙己卯舉於鄉 同上

陳氏歸諸生林朝用年二十餘夫逝撫幼子奉孀姑慈

孝稱於里中年七十五卒 同上

郝氏庠生郭茂春妻茂春死氏痛夫志未遂矢節教子貧不能延師於榻前設書案課子手則紡績口則訓誥其子衡炳貢生焮燧庠生閱五十八年 同上

王氏瞿之金妻夫早亡艱苦備歷守節三十五年 同上
張氏雷士儀妻先世涇陽人居江都歸五年而士儀病歿張年二十三遺腹生男越五年又死舅姑乃以弟子為之後張撫之成立苦節數十年而卒 同上

史氏饒寬妻寬讀書貧而好施家日落歲饑斗米千錢史日夜勤女紅以活數口寒甚衣無絮夜不得火藉草

增修甘泉縣志 卷十六
數莖抱子挑燈縫紉不輟子眉習經書皆史督誦長為
邑諸生史以喪母哀慟卒 同上

何氏名珍適新安程晉生晉生善病久不愈氏割股肉
療之及沒無嗣何哀毀誓以身殉弟起泰憐之請以己
子嗣氏曰以何繼程非禮也及葬畢遂絕粒死年二十
四 同上

張氏金元生妻元生卒張年二十遺一子在襁褓誓守
苦節家貧以女紅養舅姑伶仃五十歲撫孤成立 同上
王氏邑諸生徐宗健妻宗健讀書攻苦櫻疾死王痛夫
志未酬遺孤元美幼日夕課訓守節三十五年元美以

順治丁酉舉於鄉 同上

夏氏許字張昌祚未婚昌祚歿氏至祚家守節事舅姑
二十五年歿 同上

宋氏史文周妻婚三載夫歿氏年二十一撫遺腹子苦
節三十五年府守給以節孝可風匾額

沈氏范起鳳妻起鳳負販為生鳳死沈年二十六長子
七歲次子生四十日有勸之易志者氏攜二子結草屋
夫墓傍以織紉為活後二子皆成立年六十餘卒 同上

龔氏年十七適戴士龍未幾士龍歿龔忍死守節五十
餘年卒 同上

溫氏蕭維墜妻年十八維墜卒子方穉襁家甚貧傭針自給撫孤成立年七十九卒 同上

戚氏泰州人適江都太學生于應鰲少寡守節七十餘年卒 同上

孟氏女念父老無嗣終身不字事父四十七載迨父歿殯葬成禮同庶母陶氏祝髮為尼 同上

許氏監生汪廷柱妻年二十九夫歿於旅即生遺腹男顯儒氏教子守節歷年八十有三無疾而逝 同上

韓氏仲之彥妻夫故守節教諸子皆成立歷年八十餘長婦黃季婦張俱以節烈著人咸謂姑訓云 同上

汪氏吳道昌妻昌病氏年二十一割股救之不愈遂守節三十年教子驄成名 同上

李氏趙天祿妻天祿死李年二十誓死守節撫遺孤有仁成立 同上

李氏高向明妻年十九適明三月而寡遺腹生一子姑病刲股療之翁歿於秦扶姑柩遠涉三千里為之合葬

守節五十三年康熙十八年與旌表 同上

程氏監生江九臯妻年二十六寡撫孤苦節康熙二十一年與旌表姪澂妻汪氏二十七寡依程一室相守

亦同旌表 同上

周氏邑廩生龔溶妻夫病刲股弗救年甫二十五二子
襁褓矢志撫孤蓬華蕭然猶研朱點畫授二子經書卒
年六十三長枚諸生次祐貢生 同上

劉烈女名元英劉應麟女字李繼中年甫十六繼中病
死元英聞訃涕泣絕水漿七日自縊於寢直指以聞建

坊 旌表 同上

俞氏車從珂妻王氏珂弟從翰妻乙酉歲珂兄弟皆死
於難俞年十九王年十八同矢志守節而家甚貧以紡
績自給俞一女無子王一子中年而歿復同撫孤孫俞
年七十餘歿王年九十餘歿 同上

扈氏史記書妻夫歿苦節四十餘年親督耕墮水不死

鄰火及其廬遽熄鄉人謠曰史母節水不濡火不熱子

箴纂皆諸生纂妻王氏亦極孝刲股以療姑病 同上

楊氏林時履妻夫早喪二子俱幼氏矢志苦守長子士

佩娶卜氏孝事孀姑姑病刲股和藥後值夫歿自經姑

救之遂絕飲食旬日而死 同上

潘女名宗媿宜陵人許字黃玉轂未婚黃死潘聞訃卽

更衰經誓以死其母防之甚密卒乘間縊於臥室 同上

湯氏張椒頌妾頌以老無嗣而置氏及邁欲遣之誓死

不從頌死賣綉營齋裹土造壙事竟乘主母他出衰經

旁靈几自經

同上

厲氏阮秉謙妻夫亡守節年七十三卒子樞忠登康熙

庚戌科武進士

同上

李氏庠生蔣以善妻善早逝同側室張氏矢志守節教

三子勤學歷五十餘年長子銓國學生次鎧壬子拔貢

次鍾戊子恩貢孫翹雍正丙午舉于鄉

同上

汪氏邵伯鄉人于球妻乙酉城破球死氏亦自剄傷而

不死遂不更嫁苦守四十餘年

同上

范氏鎮江工部尚書崙之曾孫女適江都舉人于元璜

元璜公車北上值海寇犯江上被獲賊露刃脅之欲挾

以去氏奮罵不已賊怒刀劈其腦罵愈厲遂被害時年

二十一

同上

蔣氏兩廣督標副將李英妻英奉檄往桂林值孫延齡

叛英奔還氏訣別曰君為國亾家妾為君亾身兩無憾

矣索鳩懷之及逆屠城遂服鳩而死督撫題敘建坊

旌表墓在江都淮子橋北

同上

續志考正職官內無李英名遺事無考

史氏俞國賢妻年二十八夫歿遺孤甫三月撫之成立

守節四十二年康熙四十二年請旌一女字陳之韞

未嫁守節雍正元年請旌俱准給銀建坊

同上

趙氏諸生史嘉節妻性端嚴知書夫疾刲股救之及卒
生遺腹子進義家益貧傭紉自給以書口授其子稍懈
輒扑之曰吾不忍史氏書香自汝絕也苦節以終其子
補諸生 同上

聖駕南巡

王氏舉人李鑰妻舉人王彬長女也歸五載鑰卒生二
子一女曲盡撫訓之方姑疾篤焚香籲天刲股療之尋
愈子同聲康熙己丑進士四十四年
程氏孫繼士妻年二十四夫亡遺腹生一子守節撫孤
終身不衣綺紈不聽音樂至八十九歲歿康熙四十三

同上

年題請建坊

旌表 同上

周氏太學生田士英繼室生子見龍甫六歲士英歿氏
欲殉節不食者五日見龍亦不食乃忍死守節撫孤年
至九十康熙四十四年

聖駕南巡

賜御書節壽二字 同上

湯氏監生李天球妻年十九夫亡事舅姑撫二子守節
三十六年康熙四十七年題旌 同上
汪氏諸生程湄妻翰林汪楫妹也十七歸湄湄遭疾歿
氏年甫二十有一矢志撫孤姑老病氏刲股救之苦節
四十餘年子以儼中武舉 同上

列女

韓氏進士燦女貢生周師旦妻年十五歸周三載生子以忠未週歲師旦病歿氏事孀姑撫孤子姑病瀕危割股調羹救之以忠卒能成立學道邵嘉旌其門

同上

池烈女貧家子幼喪母及笄父以字吳氏長子廷望望從軍死於粵吳欲改配其次子親迎有日女知之伺其父出自縊雍正十二年題

旌

參雍正江都志

霍九女民家子生十九年矣事父母婉容愉色以孝稱許字李正榮甫十日正榮死女號痛自殺以殉通里義之為舉其喪與池烈女同葬於平山堂之右學使楊中訥為之銘曰蜀岡之巔平山之側鬱乎蒼蒼憑高西望

而嘆息曰有同邑二烈女此其幽宅雍正十二年題

旌

同上

吳氏張復陞妻嫁時年十六事孀姑以孝聞姑病久剖股肉以代藥病竟起年二十九夫卒有三子一女氏以女工自給養姑教子皆有禮法康熙二十三年題請建

坊

旌表

同上

鄭氏中丞茂華孫女也適廩生閻麟生氏幼嫻詩書動以古列女為法夫卒絕食者六日夫葬虞祭畢遂自縊遺詩曰結髮情意重拋撇兒女歸傷心千古慘烈烏願同飛有司加旌獎焉

同上

洪氏方立禮妻事繼姑汪氏汪有己生子媳於氏弗愛也凌虐備至氏怡然承順惟恐立禮知也立禮歿氏哀慟十餘年未嘗見齒泪常盈睫一目遂枯 同上

黃氏儒生高從龍妻值兵亂氏以避難損足奉竺乾刺血書經及龍歿撫二子大忠大貴皆成立氏病危次子封股肉回生年逾七十母子節孝著聞郟閭 同上

朱氏適黃家瑄未三年夫歿傭紉課子苦節三十餘年子正立諸生 同上

李氏太學生張述繼妻撫前妻子女若己出述死李年二十五止生一女後女死長子與孫亦相繼死李苦節

四十一年而卒 同上

吳氏程宗孟妻年十八適宗孟宗孟病刲股救之弗效二子幼家甚貧窘吳手紉以給饘粥後避兵山中虎咆哮而前吳祝曰婦可啖孤子不可啖也以身翼兩兒虎遂去人以爲苦節所感既卒子其祿廬墓五年 同上

謝氏蒯明字妻明未字死遺孤相生甫四歲撫之守節四十八年年七十三其孫蒯桂早歿無嗣孫婦高氏年甫十九守節歷二十九年卒且無嗣尤可憫焉 同上

葛氏張文德妻文德爲蘄水縣丞流寇犯蘄死之氏間關護喪歸里時年二十八二子一女皆在襁褓氏紡棗

自給奉姑曲盡孝養教二子有成巡鹽御史李贊元郝
浴皆旌表之同上

楊烈女黃珏橋人許字程氏未嫁而程氏子死喪過其
門烈女號痛不食父母勸之女曰已許程爲程婦甯論
嫁不嫁乎已而自縊同上

王氏秦應正妻年二十六而寡苦節三十餘年乙酉攜
其子避兵備極艱苦卒免於難子之俊登賢書同上

鄭氏高植繼室夫歿節撫孤嘗值險阻義不受辱至
毀體流血克全貞操子策及孫探皆武進士同上

謝氏名景韞適邵曰強甫二載值兵強與弟立及祖母

叔伯皆罹于難立聘劉氏聞立死亦自縊時謝氏從舅
姑避兵吳陵子在襁褓聞夫歿不食數日從父命撫遺
孤教之成立苦節五十餘年同上

汪氏歙縣人後居江都適洪正宜家貧舅老且病薪水
藥餌悉汪氏傭針以給正宜早歿諸孤皆幼汪氏力營
殯葬撫三子良儉良伊良偁皆成立同上

申氏中書維翰女文學郝錫信妻也年十八夫歿教子
沅讀書事舅姑盡禮苦節凡數十年同上

王氏進士玉藻長女適喬肅家甚貧氏傭紉以事舅姑
肅歿課三子皆成立同上

李氏黃起龍妻年十九夫歿遺姪三月每夕仰天泣拜
求生男既而果得男名天嗣教之成立任睢甯學博氏
年六十八卒 同上

張氏前指揮張恒孫女歸邑學生金玉節以哭母成疾
夫卒以哀疾益甚延三十餘年 同上

金氏吳德宣妻夫亾家道中落時金年未三十撫兩幼
子以節終 同上

甯氏陳治道妻年十六歸治道甫一載夫歿遺孤越數
月又殤上有雙親家徒四壁姑病七年朝夕侍奉勿倦
有以夫亾子天勸氏改節者氏弗答守節歷五十七年

同上

增修甘泉縣志卷十七

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成敷 桂正華 朱公純 增訂

列女中

朱氏喬元馨妻歸二載而夫歿子甫週歲氏含辛撫孤
養舅姑唯謹終三十年足不出閫卒時異香盈室人咸
異之 參雍正江都志

陳氏李光第妻夫亡氏年二十七歲飲冰茹蘗至六十
四歲終媳劉氏亦二十七而寡撫遺孤夢英成立婦姑



俱稱貞操 同上

高氏林石臣妻十六于歸十九夫亡于士儀尚在襁褓
翁抱重恙高刲股為饋翁疾愈 同上

鄭氏舉人秦之俊繼室夫病篤刲股以進不效撫孤苦
節三十四年 同上

胡氏諸生王國本妻年二十六夫歿苦節自矢教育孤
子歷五十八年子任曾孫夢旂皆補諸生 同上

余氏劉居蓮妻夫歿守貞四十餘年年七十八卒 同上

陳氏梅調鼎妻于歸甫及二載夫歿苦節三十餘年
閻烈婦揚州人失其夫姓名夫死自縊以殉 同上

附王士祐廣陵閻烈婦古詩三首河洲有鷺鳥關關
鳴相隨顧影戀儔匹飲啄無乖離既鮮弋人慕復何
網羅施運忽兀陽九中秋悵分飛寡鵠與孤鸞誰能
釋此哀長鳴念舊侶引吭一何悲鷺性輕縉繳宛轉
從此辭維彼鴛與鴛永附連理枝 高門毓名媛貞
烈本自天幼聞從德訓長嫻詩禮篇願言卸鉛華遠
希椎布賢方將共白首何期中道捐從一禮經著之
死風猶傳霜縑報夫子授命無遷延烈哉巾幗流心
與金石堅以之風百世廉立及孺頑 慷慨非所難
從容良不易方其誓几席當無兩岐眎寒泉延二豎

單裕冀沉痾垢髮與蠟丸百計求其志既割兒女情
魂應化精衛甯知千載名祇求一心遂母也乃天只
殊不諒人意太息緬芳徽豐碑永無愧 古鉢集

丁氏張均妻均亡丁年二十八守節終身撫孤成立 同上

吳氏周珽妻順治十六年海氛及揚珽死於賊吳年始
二十撫一女守節四十餘年 同上

姚氏年十六適闕憶生生三子閱十載夫歿氏誓死撫
孤苦節六十餘年 同上

仇氏李杜文妻年二十四夫歿守節四十餘年 同上

周氏前光祿署正喬可傳妻年十六歸可傳閱十載夫

歿生二子方在襁褓氏備歷艱辛備紉教子後次子死
遺孤孫氏撫之成立苦節五十年 同上

劉氏湯志遺妻年三十志遺歿氏矢志守節奉翁姑甘
旨無缺撫子成人歷五十三年 同上

郃氏王肇鎬妻夫歿氏年二十八茹苦守節至七十有
二歲無病而終 同上

程氏顧養正妻于歸未三載而養正歿氏年二十食貧
守節撫一子苦歷四十餘年 同上

潘氏生員汪清妻清卒幼子方在襁褓氏苦節自矢子
長皆自課之年六十卒 同上

閔氏生員吳瓚妻嫁六年而寡撫庶出子洵成立洵又先卒復撫孫杓苦節歷四十年康熙三十八年題請建坊

坊 旌表 同上

糜氏林堪妻堪歿苦節自矢七十餘年卒 同上

馮氏生員陳維世妻維世歿馮守節撫孤歷三十餘年

子康為邑諸生 同上

睢氏殷其雷妻其雷死子甫三歲睢撫之歷四十餘年

同上

王氏朱應時妻應時亡王事舅姑育孤子守節六十年

同上

王氏于應聘妻年十九歸應聘未浹歲而寡遺腹生男

名桂叢教之成立終身茹素苦節四十七年 同上

宗氏桑應奎妻夫卒年二十九撫兩子事舅姑最孝家

無宿春日營紡績以給守節四十餘年 同上

查氏金瑞玉妻夫歿年甫踰二十姑憐其少又家貧微

言諷之氏截髮矢志撫藐孤堯年上奉老姑薪米之費

悉出菑工指恒流血堯年稍長教以讀書俾克成立為

儒者苦節歷四十餘年乾隆元年題准 旌表

徐氏太學汪遐齡妻幼嘗割股愈母病既嫁值夫與翁

姑病皆割股療之前後凡四次方療姑時將產毅然奏

刀尤人所難者二子敦敏膚敏俱能文膚敏尤善書法

合參府縣通志

曹氏朱坪妻坪有隱德善醫曹每出簪珥購藥助其施

子坪歿曹茹素終身 雍正江都縣志

王氏適新安吳伯順伯順歿子女俱幼家貧甚氏以女

工自給訓子有成苦節三十餘年 同上

顧氏貢生歐民女適諸生王晉中晉中歿顧苦節三十

餘年 同上

王氏孫肇符妻年十九夫亡撫遺腹子奕葉後葉授室

殷氏葉卒殷亦以遺腹生子壬年八十有二殷年六十

有一里中稱一門兩節焉 同上

葉氏貴秉敏妻敏歿守節撫幼子三人皆及成立曰吾

今可見夫於地下矣遂大哭而絕 同上

鄭貞女江都邵伯人許字潘家子聞夫死即自殉焉

附費錫璜詩貞女鄭氏女聘為潘家婦本是同庚生

生小同里住陵茗附石岡長願石岡固石岡一日摧

陵茗不他附生不同衾枕死願葬一處誰謂妾命薄

為歡到終古請看路傍墳定長鴛鴦樹 掣鯨堂集

楊氏余三台妻守節數十年教子鼎升成家 同上

陶氏武科張敏母夫逝持節不渝教子成名 同上

陳氏蔣有譽妻生二子有譽歿氏堅持苦節撫孤有成四十餘年家賴以振 同上

朱氏諸生黃灝妻年十九灝歿生遺腹子宮擅苦節自矢歷數十年 同上

彭氏汪周鼎妻鼎亡氏年二十八苦節撫孤五十餘載 同上

汪貞女靜姝祁門人明給事中惟效女孫明經震英女許字同邑馬承運子恒未婚恒早逝貞女時年十八願歸夫家守志縞衣蔬食事堂上能得其歡病不服藥安命而已先是震英家忽有孤燕來巢時汪氏方鼎盛家

咸訝之既而恒訃至始知其為貞女祥也恒弟謙以長子曰楚為之後茹苦四十七年卒於揚子曰楚孝友克家有文學請旌於

朝建綽楔焉 本傳

鄭氏諸生錢志偉妻夫亡守節教子永年入泮 雍正府志

方氏易尚文妻守節五十餘年 同上

袁氏梁巖妻苦節終身 同上

梁氏卞懋爵妻守節五十二年 同上

梁氏生員蕭維垣妻年二十九垣歿茹荼植節五十餘

年子說為諸生 雍正江都志

曹氏王士美妻年二十八而寡撫孤安貧守節三十餘年 同上

吳氏汪壽岳妻翁病劇割左臂肉進之立愈未幾夫歿於外櫬返復割右臂肉奠曰所不與君養老成孤者有如此肉後以子貴 封太淑人 同上

譚氏孟宗孔妻事舅姑以孝聞舉二子教之有成 同上

李氏季光先側室光先歿李年二十九苦志守節紡績教子子良謨國學生 同上

楊氏程廷珏妻年二十七夫歿子錫昌甫二齡氏紡績撫孤成立晚好施捨鄉里多沾其恩年八十餘卒 同上

沈氏俞廷燮妻夫歿氏守遺孤成立歷五十餘年 同上

張氏許繼周妻繼周歿苦節三十餘載 同上

鄭氏何嗣昌妻嗣昌病劇氏割股以療越一年夫卒遺孤方在襁褓撫之成立苦節三十年 同上

石氏鄉農石子珍女陳邦立妻嫁四年而夫歿子長年甫二歲氏食貧無二志以清明日掃夫墓歸慟哭自縊 同上

蘇氏母疾割股以療歸附貢生韓奕姑病氏復割右股進之其季媳李氏年十九夫病篤割股不能救請於堂上繼伯子嗣齡撫育教誨歷四十九年 同上

張女許字庠生劉用恕未嫁恕歿年二十父母更擇配女不從亟請歸劉事翁甚謹翁以貧又欲嫁之氏聞斷髮破面誓不欲生惟紉績以養翁逾三年歿

同上

蕭氏賈寅生妻年二十七歲夫歿立嗣勵節四十二年

同上

俞氏蕭日曠妻日曠割肝救母歿俞年方二十五歲事

舅姑家貧甘旨皆資其十指舅姑歿拮据以殮殯葬皆

竭力中禮守節歷四十九年終雍正三年題准建坊

旌表里人耐祀於梅花嶺日曠祠

同上

楊氏張澈妻澈死楊年二十子尺木甫週歲食貧訓子

補郡諸生先後娶二媳皆故各遺一子又躬自撫育及

其成立年七十三卒

同上

楊氏庠生陳應鳳妻夫歿氏年二十八遺子華尙幼茹

苦教子官秀水知縣氏年八十

同上

俞氏蕭廷芳妻年二十而寡矢志撫孤子長娶婦生孫

後子孫相繼亡媳亦改適蕭遂依母家紡績自給卒年

六十二

同上

蕭氏石嶼妻事夫至敬夫亡哭晝夜不輟瞳子墜焉由

是飯不稻米啖楚餅八年歿

同上

汪氏黃應聘妻二十三歲夫亡孝養孀姑撫子成立守

節六十年於雍正元年題

旌 同上

吳氏汪文斗妻方迎娶輿甫及門文斗以暴疾歿氏聞悲悼求赴父母不許氏截髮毀容誓必死父母聽之遂往爲文斗執喪舅姑心惻爲之立嗣守節三十七年雍正二年題 旌 同上

王氏中書方成可側室夫疾革時王年十九呼至榻前畀以金帛遣嫁王撫床號痛截髮自誓夫故卽屏居小樓惟朔望下樓一謁其嫡撫子願瑛成名年六十一歲而卒雍正七年 旌表願瑛厯官至觀察有聲 同上

錢氏卞玉相妻年十九適卞夫已臥疾年二十二夫歿

事太姑暨翁姑盡孝守節三十七年嗣子之鑿歲貢生

雍正二年題 旌 同上

續志考正選舉貢生內無卞之鑿

蕭氏孝子日曠女歸高成英生子女各一年二十七英卒荼苦守貞英弟成業敬事寡嫂撫其子女如己出未幾業卒妻俞氏年未三十無子守志妯娌以讓以和稱一門雙節 同上

張氏耿大廉妻年二十四寡生遺腹子兆昌守節五十年以歿雍正三年 旌表 同上

錢氏卞咸亨妻年二十五夫病刲股進之不效誓隨夫

死祖姑力勸之方止勉撫子女而孝事祖姑後子泓有
文名為歲貢生計守節二十年雍正四年 旌表 同上

續志考正選舉貢生內無卞泓

俞氏徐裔蔚妻年二十二而寡守節四十五年侍祖姑
病便遺皆手自洗滌姑歿鬻釵珥以殮撫二子俱成立

雍正四年 旌表 同上

楊氏庠生郭綬妻年二十而寡奉舅姑育孤子守節三
十七年雍正四年 旌表 同上

湯氏吳願臣妻年二十二歲夫歿家貧苦節操作以事
翁姑計守節三十三年雍正四年 旌表 同上

徐氏吳敦佑妻二十四歲夫歿無子跪求孀姑程氏以
嫡姪立後撫之成立守節二十九年雍正四年 旌表

同上

韓氏李宏涵妻二十四歲夫病刲股以進不效韓矢志

撫孤計守節三十三年雍正四年 旌表 同上

仲氏藍應舉繼妻二十八歲夫亡甘貧守節五十五年

雍正四年 旌表 同上

居氏王待聘妻年二十四夫亡子未一週居親自操作
訓子成立守節三十一年雍正四年 旌表 同上

程氏吳念祖妻年二十一夫歿苦節撫孤四十一年雍

正五年 旌表 同上

王氏鄭毓琮妻二十四歲夫亡後翁又客死江右王盡鬻其產倩人輿柩回里塋葬事嫡庶兩姑俱極孝嫡姑歿殮殯尤盡力焉繼一子又隨歿苦節三十二年雍正五年 旌表 同上

閔氏巴士遇妻年二十四夫歿撫孤矢節奉孀姑盡孝 旌表 同上

羅氏吳植松妻年二十六夫亡於西粵親往撫柩葬於祖塋撫孤守節四十三年雍正五年 旌表 同上

馬氏胡重英妻二十二歲夫歿守節四十七年雍正六年 旌表 同上

年 旌表 同上

朱氏淶洋湖虞大義妻婚後期年大義死姑亦相繼歿大義兄大典欲奪朱志朱不從引刀扼吭穿其喉三寸許死年二十二 同上

吳氏程昊孝妻二十九歲寡撫孤守節二十六年 同上

季氏高以遵妻年十九夫亡有二子叔利其遺產逼令改適季投繯投井並為人救不死乃攜二子避出以女紅自給悉棄其所有與叔俟二子長成至七十四歲終

同上 王氏高克標妻年二十六夫亡事祖姑與姑及歿殫力

營殯葬撫三子俱有成苦節四十年至六十六歲終同上

王氏鄭祖怡妻年二十九寡事孀姑育襁褓子苦節三

十五年 同上

汪氏方文學妻夫歿年二十七無子請於舅姑立姪天

育為嗣撫養教誨如所生苦節二十一年康熙丙子天

育舉於鄉 同上

鄔氏劉國儻妾夫卒遺二孤長甫二歲次未一月氏守

志撫孤歷三十餘年次子謙雍正癸卯舉於鄉 同上

陳氏韓汝舟妻夫早歿無子苦節終身曹氏庠生韓汝

泰妻年十七夫亡撫遺腹子根定苦節數十年 同上

孫氏吳兆熊妻嫁三年熊病劇孫割股肉兩片血濡衣

裙暈而復甦熊竟不起後二日孫哀號創裂而死 同上

李氏宋丞相庭芝後適高士衡衡卒撫遺腹子茹苦奉

姑姑病劇割股以救守節三十年 同上

楊氏年十六父病割股獲愈適庠生樂世采姑病又割

股療之氏妹適俱玉紳夫亡年十九矢志撫孤子復天

氏歸依父家後繼姪長松為嗣婚娶皆出女紅守節終

身 同上

程氏進士文正女適監生江曷曷初疾氏割股屢進不

差踰兩月以悲痛死 同上

姜女幼字趙南山未嫁夫亡氏往弔誓死其母強之歸是夜飲鹽鹵數碗而死縣令張瑀表其墓 同上

吳氏陳樞妻夫病篤泣禱于天請以身代絕食成疾卒

後夫病尋愈 同上

秦氏高克閭妻年二十夫亡吞金欲殉不死乃守節嫁

其二女立姪為夫後卒 同上

萬女名康淑幼字袁氏子袁病亡女請往視殮父母不

可女於邑登樓自縊死乾隆六年 旌表

周氏汪沂妾年十九生子彌月沂歿嫡憫其幼令改適

周抱子哭矢志勿二及子汝樑婚方有孫而子媳相繼

歿周更撫孫時照成立娶孫媳閔氏生曾孫培時照又

早喪周偕孫婦閔氏撫培至七齡年六十九歿閔撫孤

子培家益貧紉績拮据為培婚生子名甫四齡培復亡

閔偕婦張撫孫亦如周偕閔之撫曾孫焉閔年廿六而

寡歿年七十五培妻張氏撫孤時二十六壽八十五矢

節之年與周閔等凡四世各苦節五十年 同上

鄒氏適萬氏子萬貧而無賴鄒姿頗麗諷之以不貞鄒

恚赴水死 同上

徐貞女縣學生復之女許字同里閩班生未娶而班生

歿貞聞欲臨喪家人以禮阻之遂誓死不更適依寡母

樓居二十年幅巾覆首繡大士像一軸懸於室中晨夕禮拜茹素終身後歿於母家 同上

范氏杭一震妻年二十一夫歿遺腹生男苦守三十餘年 同上

葛氏高子碩妻守節三十六年終其身 同上

王氏周士英妻二十一歲夫歿守節五十三年 同上

歐氏潘大謙妻二十二歲夫歿守節五十二年 同上

高氏貢生蕭廷瑞妻夫早歿守節至八十一歲卒 同上

陳氏魏學祖妻年二十一寡事病姑立姪之中為學祖後教之讀書食餼有聲守節至七十外邑令龔詳請題

准 旌表

陳氏葛亮妻亮故貧歿父母俱存遺三子氏紡績以為事育口授諸子經書子稍長以父所著四書講義授之曰此爾父心中血也子崙乃手輯板行之陳守節五十餘年子崙諸生崙歲貢生另有傳 同上

奚氏舉人史奭妻奭早逝奚撫孤克欽成立年踰六十卒 同上

裔氏年二十四適孫大成大成母及二女俱不潔氏返母家語其母以死誓不辱及還姑與二女方同客歡飲氏耻之乃扃門縫紉其袷相以青白線二縷自縊死知

府孔毓璞為立墓於雙烈之側雍正十三年 旌表同上

程氏貧民項起鵠妻婚甫三月起鵠賈粵西死於岑溪

縣雍正二年十月訃至氏號痛誓以身殉次年值起鵠

週忌自縊而死時年二十四歲里人葬於平山雙烈之

右邑令王元穉為下拜題碣曰烈婦項程氏之墓雍正

十三年 旌表

朱氏簡士德妻夫歿撫遺孤子成立守節三十三年江都志

樊氏焦必萃妻年十九夫歿撫遺孤子成立守節四十

四年同上

周氏監生湯啟哲妻年二十二寡苦節二十餘年同上

戴氏韋尙義妻夫歿赤貧苦節二十年同上

黃氏王士林妻二十五歲夫歿苦節撫孤三十五年同上

童氏韋之珩妻苦節三十餘年同上

羅氏胡錦雯妻二十五歲夫歿守節三十一年乾隆五

年題 旌

鄭氏閔行妻二十八歲夫亡撫孤奕儁娶婦姚氏姚方

二十七歲奕儁客死淮北襁負其子華渡河扶櫬備嘗

艱苦二寡一孤煢煢相守鄭氏守節三十五年姚守節

三十年題准 旌表雍正江都志

王氏庠生史品節繼妻二十四歲夫歿守節至今四十八年子道義府學生事母至孝 同上

朱氏裴晉駟妻年十八于歸閱三月夫歿守節二十九年今四十七歲 同上

江氏庠生蘇廣妻年十八于歸閱六月而夫歿撫遺孤子允德年十七補諸生娶婦曹氏二年允德歿曹年二十四歲事姑撫孤備嘗艱苦江守節四十八年曹守節

二十四年曹子蕃入江都學 同上

張氏潘仁傑妻年二十九夫亡守節事八十之翁撫七齡之子歷今三十六年 同上

馮氏丁某妻守節三十年婦朱氏亦守節四十年 同上

姜氏徐恆初妻年二十八夫亡守節至八十六歲 同上

李氏庠生瞿日升妻年二十餘夫歿守節三十年 同上

丁氏姜履坦母二十五歲夫亡守節今年踰九十 同上

余氏吳學仲妻二十九歲夫歿守節五十年 同上

高氏貢生耿鳴球妻年二十六夫歿守節二十餘年 同上

許氏字庠生李清志未婚清志歿氏聞服衰麻至喪所

憑棺大哭遂留事翁姑不五年病歿 同上

方女父用威母吳氏病篤割股二次進之痊字仇觀瀾

未婚而寡女號慟欲歸於仇兩家俱阻之女不從遂歸

增修身學志 卷十七 列女

仇氏茹素衣縞垂三十年邑令蔣鶴鳴旌之曰媲美共姜同上

吳氏幼字仲立本立本未婚歿氏奔喪至其家孝事翁姑雖至戚不通半語未幾翁歿家益貧氏紡績養姑歷三十六年邑令張有觀旌之同上

郝氏孟賜榮妻年十八夫亡上事翁姑下撫孤子苦節十八年而歿同上

蔣氏朱時麟妻夫亡守節撫子鳴岐鳴荆俱入學年五十餘歿同上

宋氏庠生張淑妻二十五歲寡奉姑至孝姑歿柩在室

鄰火將及之宋泣號拜禱火即止守節三十五年歿乾隆元年題 旌

隆元年題 旌

蔡氏桑延齡妻二十歲夫歿守節六十一年雍正江都志

高氏監生郭琦妻守節今四十年同上

湯氏庠生朱泓繼妻于歸歲餘泓沒湯年二十六撫前婦子繩如己子守節今三十二年乾隆四年題 旌

張氏孫鼎妻二十四歲夫歿撫遺腹子守節三十五年同上

王氏史克統妻年十七于歸半載夫歿值翁病氏割股

和藥進之與孀姒趙氏並姪女效廉同居守節三十餘

年 同上

徐氏蕭廷麟妻姑朱氏衰年齒落以乳飼之鄉黨稱其孝 同上

李氏蔣學禮妻姑老疾數月不解衣帶學禮死李年三十苦守三十餘年 同上

饒氏庠生王業昌妻喪夫遺孤二歲盜劫其家饒置孤子複壁索孤火灼其膚終不言而免苦節四十餘年歿子監生復安妻魏氏事姑孝常以舌舐其瘡守節五十四年 同上

彭氏王業中妻守節五十餘年 同上

蘇氏王國泰妾國泰歿蘇矢志撫孤終身不茹葷衣帛

歷三十三年歿子宜爵庠生 同上

楊氏杭篤生妻年二十五歲寡守節三十餘年 同上

薛氏主簿徐爾揚妻守節今四十年 同上

續志考正後複出

朱孝女名蓮性至孝雍正乙卯父病割左臂肉和藥以進閱五年母病復割右臂肉和藥以進俱不效痛深傷重家人延醫治之女曰女不可以體膚示人遂病歿士大夫俱作詩歌弔之

吳氏孫元昭妻昭客皖死氏迎柩歸葬守節三十八年

歿

同上

朱氏吳御繼妻二十八歲喪夫有子甫三歲撫之成立

今守節三十六年 同上

王氏監生李正東妻年十八夫歿遺腹生一女三黨勸

之改適王誓以死守後依其女以活苦節今三十三年

同上

方氏年十六適余佳庚及二十二夫歿方撫兩月幼子

守節二十五年乾隆元年 旌

陳氏閻苞生妻年二十餘夫歿生遺腹一子上養舅姑

以女工易米而子女食麥屑自食糠粃舅姑歿不離柩

側者三年今六十有七苦節歷四十餘年乾隆三年

旌

石氏李標繼妻嫁未一年夫歿守節二十六年乾隆二

年題 旌

張氏陳士坤妻夫卒遺孤八歲守節四十年弟士信亦

早卒無子妻凌氏同守節姑病刲股和藥以進 雍正江都縣志

劉氏黃家章妻夫歿劉苦節數十年撫二子穎鎔俱補

諸生 同上

張氏庠生李境妻守節四十九年次子婦焦氏守節三

十年歿乾隆五年 旌

張氏侍郎張鵬女庠生李肇斗妻姑病剖股和藥以進
二十一歲夫亡守節三十年同上

奚氏趙炳蔚妻年二十七夫歿撫四歲孤守節四十六
年乾隆二年題旌

劉氏朱應祚妻年二十四夫歿守節五十三年同上

倪氏蔣士標妻年三十寡苦節三十三年子獻邑庠生

雍正江
都縣志

喬氏張延慶妻二十七歲夫歿守節三十六年同上

顧氏生員高鼎牧妻年二十八夫死事姑至孝教子有
方姑病夜深潛齋沐焚香籲天求代姑垂沒語氏曰汝

孝誰知生無以報死當佑汝子盡成名耳守節四十餘
年歿長子元崑康熙戊戌進士福建鹽法道仲子元崑
康熙丁酉舉人邳州學正同上

余氏高熊彥妻彥卒余年十八遺腹生子彭年未幾翁
姑相繼沒盡力營葬挈子歸母家或潛謀奪其志余與
孤兒夜投伯高夔彥告以故欲自盡夔留之給衣食焉
彭年漸長氏使就村塾天甫明即迫之出後彭年補諸
生未幾復病死氏益貧窘苦節七十一年壽八十九卒

同上

章氏劉鴻功妻守節三十五年同上

馬氏孫枝藻妻守節五十三年至八十一歲歿 同上

余氏王彥孝妻年二十三生子而夫歿守節五十年 同上

胡氏許士圻妻守節至今三十三年 同上

汪氏湯有虔妻年二十四寡守節今三十餘年 同上

瞿氏貢生趙仙庚妻二十九歲夫亡守志今二十六年

同上

吳氏王元泰妻夫亡守節三十餘年 同上

于氏進士雲石女年十七適庠生李錡早亡遺一子肇

登甫五齡家甚貧氏撫孤守節冬月無絮爨下斷炊族

人勸其改適氏以死自誓至自縊兩次救免苦節四十

餘年肇登餼於庠貢成均 同上

續志考正肇登係府學生乾隆二年貢選舉內脫

鄭氏張世名妻二十一歲夫亡守節四十七年 同上

王氏李元凱妻夫亡割髮矢守節三十七年 同上

劉氏吳嘉游妻二十六歲夫歿守節三十四年 同上

常氏生員凌祐穎妻撫孤守節五十五年今八十五歲

同上

沈氏賈正妻年二十二喪夫生遺腹子守節今四十年

同上

郭氏朱懋昭妻夫亡守節今五十餘年子珏雍正癸卯

舉於鄉 同上

蘇氏吳漣妻二十一歲夫亡守節今三十年乾隆五年題旌

樓氏鄭國綸妻二十一歲夫歿生遺腹子守節今二十年 雍正江都縣志

杜氏張之政妻年十六于歸姑疾割股瘳之二十七夫亡翁勸之改嫁不可事翁逾孝歲歉必購米作炊以奉而自食糝糠止一子已娶媳而子天一室二嫠二十餘年人不堪其苦而姑媳安之 同上

單氏年十六歸孫甯生甯生病刲股不效縋首柩旁姑

救之甦遂矢志事姑姑得痺疾飲食便溺皆手親之數

年不懈苦節三十年乾隆二年題旌

汪氏羅芳一妻年二十八夫歿號泣至目誓計守節四十五年 雍正江都縣志

孫氏束坤妻坤遠出舅患癰姑患痢孫手滌中裙奉侍百有餘日後姑歿時語曰勞汝一生無以報汝願汝兩媳亦如汝孝聞者感泣 同上

汪氏凌虞士妻年十九夫亡撫遺孤守節今三十六年 同上

葉氏黃孝先繼妻夫亡守節歷四十五年題准旌表

史效廉癸卯舉人繼鮪孫女許字張憶木未嫁憶木歿女號哭臨喪嚙指誓不再嫁時寡母趙年七十女日事針黹手種舍旁隙地給母饗殮歲時祭其祖考并及亡

夫歷今二十三年矢節彌篤云 同上

李氏姚一松妻十八歲夫歿撫孤子守節三十九年 同上

王氏監生黃也山妻年二十七夫歿守節三十四年 同上

仇氏蔣翹妻年二十四夫歿守節十餘年而亡 同上

程氏監生洪元怡妻年二十九寡與妾江氏同守節四十餘年俱於乾隆三年 劉旌

王氏呂俱雋妻二十九歲寡苦節三十八年 雍正江都縣志

史氏潘永吉妻二十歲寡生遺腹子苦節五十七年乾隆三年 旌

葉氏俞椿妻年二十九守節撫孤至九十三歲終 雍正江都縣志

卞氏俞廷玉妻守節教子至善洪善俱武舉 同上

陳氏杜天吉妻年二十二夫歿生遺腹子士立守節四十五年 同上

吳氏項德輔妻年二十三寡撫孤志發成立至七十終 同上

張氏孫愚生妻二十三歲夫亡苦節六十七年至九十 同上

曾參甘肅縣志 卷十七 列女

終同上

汪氏諸生程麟祥妻二十九歲夫歿今守節四十六年

同上

楊氏張士賢妻年十九夫亡越七日舅姑相隨而歿楊

疊舉三喪不勝其慘越五月生遺腹子守節今二十七

年同上

續志考正後複出

程氏監生余之衡妻年二十四夫亡育三子守節三十

年病劇日前之所以不死以三子未立也今可死矣不

服藥而歿乾隆三年旌表入祠

同上

殷氏蔣旭妻年二十甫婚兩月夫亡隨執翁喪事哀姑

鞠遺腹子子復天苦節二十餘年

同上

龔氏孔學龍妻姑病刲股治療夫歿艱難鞠子守節三

十一年

同上

翟氏監生吳琦妻守節三十五年

同上

高氏庠生楊宏選妻守節三十二年

同上

孫氏胡高標妻守節三十一年

同上

汪氏王咸徵妻守節四十八年今七十六歲

同上

奚氏潘皚妻年二十七夫歿守節三十年乾隆二年

旌

高氏潘照妻夫亡時年二十三守節二十一年而歿備
歷艱苦為鄉黨所稱乾隆四年旌

陳氏李友椅妻二十二歲夫亡撫孤守節閱六十年正雍

江都縣志

王氏李友柏妻年十八夫亡撫孤守節至八十一歲歿

同上

何氏李友榛妻年二十夫歿撫二子守節至八十七歲

歿同上

彭氏李友梗妻年十九夫歿守節至九十六歲歿子之

璜補縣學生同上

吳氏高相州妻二十七歲夫亡守節至七十歲歿同上

鄭氏閔士琬妻年二十夫歿苦節四十餘年同上

蔡氏姜佩蒼祖母年十九而寡遺孤二歲撫之至長娶

婦袁氏二十六歲而寡姑媳相守蔡歷年六十九歿袁

歷年四十八歿同上

閻氏生員周子信妻年二十七夫歿事姑守志康熙已

卯河決從洪濤中手挽翁夫兩棺厝之高阜獨支門戶

撫養二子守節二十五年歿同上

韓氏生員潘瀛妻年二十一夫亡立姪為後苦節四十

六年巡撫張公伯行旌其門乾隆二年旌

程氏國明之女年十八配方士鑑甫及一載夫病割股和藥不效氏志堅金石歷三十九年乾隆二年旌

張氏閔天緯妻年十九夫亡撫孤守節歷三十一年正雍

江都縣志

王氏謝廷恩妻年二十八夫亡繼姪捷生為嗣守節四十七年同上

馬氏黃履勗妻年二十三夫歿守節歷今二十七年同上

俞氏許士雄妻年二十四夫亡撫孤守節歷今三十八年同上

周氏裔翠屏妻年二十六孀守節四十三年同上

蔣氏生員郝喆妻二十九歲孀守節四十三年同上

吳氏方敦化妻年二十寡守節近四十年歿乾隆二年

旌表媳許氏年二十一寡與吳伶仃相守今將三十年

矣同上

劉氏周在朝妻年二十六夫亡今守節四十三年同上

蔣氏監生胡起元妻二十六歲夫亡無子以姪為子孝

事翁姑割股療翁病守節撫嗣今二十六年各當事匾

旌之乾隆元年旌

蔣氏張克明妻二十三歲夫亡撫孤守節十八年歿正雍

江都縣志

鄭氏趙嶸妻二十三歲夫亡守節四十年今六十三歲

同上

張氏監生劉光裕妻婚半月夫遠出歸半年夫死家貧

以文科醫自給今守節三十三年部使者多表其閭同上

劉氏張思孔妻二十三歲夫亡守節五十九年終同上

方氏王煥妻年二十三夫歿守節今三十九年同上

張氏井養賢妻守節三十餘年同上

續志考正後姑胡氏傳內複出

張氏趙君榮妻二十九歲夫歿守節四十七年同上

劉氏子元璜繼妻二十七歲夫歿守節五十二年同上

羅氏于仁鑒妻二十四歲夫歿今守節四十二年同上

季氏于俶整妻二十五歲夫歿今守節三十年同上

鄭氏張峻標妻年二十六夫亡撫四歲孤苦節四十七

年歿同上

周氏常守信妻守信墮水死周年二十六族人謀奪其

志周斷髮矢志撫二孤苦節三十七年歿乾隆五年

旌

白氏郭士英妻年二十八夫亡事孀姑撫幼子苦節四

十三年雍正江都縣志

顧氏諸生繆斌妻年二十四寡撫孤守節二十四年歿

同上

洪氏程曙妻年二十九夫亡守志撫子子又歿繼三歲

孫相依至九十六歲雍正元年 賜粟帛 同上

王氏庠生姚典妻年二十一夫亡代夫事舅姑竭力殯

葬又為夫幼弟娶妻生子以延宗祀苦節歷四十年 同上

吳氏王廷傳妻年二十一夫亡無子其翁姑年已六十

家無次丁勸翁納妾生一子而二老繼歿吳乃撫幼叔

長成盡以遺產畀之而留薄田自給守節歷今已五十

一年 同上

洪氏潘濟遠繼妻年二十五夫亡遺腹生一女并前出

一女矢志苦節三十年歿 同上

萬氏項嘉遠妻年二十一夫亡守節歷今二十七年乾

隆五年 旌

孔氏劉士通妻年二十三寡守節歷今五十二年乾隆

三年 旌

周氏石守義妻年二十五守節歷五十年乾隆三年

旌

俞氏潘君榮妻年二十九寡守節六十一年壽九十終

雍正江都縣志

薛氏宋之歐妻年十八喪夫苦節五十餘年 同上

增修長縣志 卷十七 列女 續

盛氏庠生狄時雍妻年二十一夫亡守節歷今四十餘年同上

程氏葉幼禽妻年二十七夫亡事祖翁及孀姑盡孝生一子又歿苦節歷今三十七年同上

汪氏吳文升妻年二十四夫亡守節歷今二十八年同上

沈氏張文秀妻年二十七夫亡守節五十八年終同上

羅氏庠生孫友仲繼妻年三十夫亡守節歷今三十二年同上

韓氏進士日起女適庠生喜友龍夫病刲股和羹進之不效守節撫孤娶婦後乃大慟跪夫木主前曰可相隨

地下矣遂絕粒死孫立本庠生娶汪氏亦二十一歲守節

節乾隆三年 旌

馮氏寇鐘繼妻十四嫁十六孀家貧紡織撫孤苦節三十餘年乾隆三年 旌

吳氏庠生方祖耀繼妻二十八歲夫亡守節三十三年

乾隆二年 旌

王氏張啟緒妻十六于歸未期月夫歿孝事舅姑撫姪為嗣苦節三十五年雍正江都縣志

王氏沈日融妻年二十七夫亡守節四十年同上

錢氏李日翔妻年二十八夫亡守節五十餘年同上

汪氏劉廷弼妻年二十七夫亡撫孤守節五十六年雍

正元年 賜粟帛 同上

徐氏彭苓妻年二十三夫亡生遺腹子苦節三十五年

子又亡媳張氏亦守節 同上

朱氏黃柳人妻年二十夫亡生遺腹子苦節終身 同上

曾氏襄愍公裔孫女國學生蔣銳繼室銳歿曾撫前妻

三子已二子俱完婚娶先後四子相繼亡曾率子婦張

氏史氏曾氏陳氏皆茹荼苦守誓志不二以撫鞠諸孫

人稱一門五節 同上

鄭氏吳人元妻年十九夫歿一子方襁褓撫之成立守

節三十八年雍正五年 旌表子家龍授鹽運副使 同上

浦氏宦介公妻年十九夫亡子周歲撫之二十五年子

與媳偕歿又撫其孫苦節六十九年雍正六年 旌 同上

何氏孟嘉諭妻年二十七夫亡事翁姑盡孝苦節二十

六年歿雍正六年 旌 同上

田氏龔氏俱許培元側室培元歿時田年二十三龔年

二十一俱茹苦守節撫二子成立歷今三十餘年 同上

相氏閔懋勗妻年二十夫亡守節不渝 同上

夏氏蔣泗雲妻年二十四寡事舅姑撫孤子苦節五十

年至七十四歲歿 同上

程氏監生鄭一桂妻年二十三夫亡守節三十年 同上

龔氏吳自鈺妻年二十二夫亡苦節撫孤今四十六年

同上陸氏知州應幾女監生郝勸繼妻年二十九夫亡事孀

姑極孝親授孤子經書苦節二十八年歿乾隆二年

旌張氏程燭妻年二十七夫亡撫孤守節十八年 雍正江都縣志

王氏張衍恒妻年二十夫亡惟一女撫之出嫁苦節終

身 同上叢氏太學生楊仁澤妻年二十五夫歿守節撫孤三十

九年卒 同上

徐氏女許配淮安庠生諸某未嫁而夫亡女成服于家

聞其殯日沐浴縊死諸氏歸其柩與夫合葬焉 同上

貴氏名本賢適陳某不善治生蕩其家託於妻黨一日

謂貴曰吾將去任汝改適人貴一慟而殞 同上

許娥年十七字儀徵楊之薇未嫁薇歿娥欲至夫家俱

死父母不可中夜遂自縊 同上譚氏明經費益修妻益修性狷介譚辮績同甘苦值歲

災不能存活誓以潔死自沉井中其姪女三姑為阮玉

聲妻亦泣謂玉聲曰舅姑年俱八十可善事之從入井

增修古身集卷之十一
死 同上

傅氏李載揚妻事舅姑孝遭歲饑度不能活忍死以養姑曰姑耄失明吾何忍輕一死及計無復之乃泣拜姑前入井死 同上

戴氏杭國鉞妻年二十八夫歿事翁姑生養死葬盡婦道如子職撫五月孤子未幾孤又夭氏絕食三日不死守節二十八年

丁貞女幼甚孝父母愛之欲擇佳婿年三十未得偶因請終養朝夕不離父母者二十餘年歲丁亥一月中父母俱中危疾起臥必藉人扶抱兄又孱軀不勝任惟女

一身兼之及父歿甫二旬兄又歿女盡將所有環珮簪珥貨之以備兩喪而奉母撫遺姪以老今母年八十八女年六十一

劉氏庠生張天祥妻年二十五而夫歿苦節四十年乾隆五年 旌

金氏吳天城妻幼克孝有小孝女之稱年十六于歸躬操井臼事舅姑年二十六夫歿撫二孤守節五十四年八十二歲歿乾隆三年 旌

胡氏井三才妻三才歿氏年二十九遺孤養賢纔三歲紡績以供舅姑乙酉城陷舅姑死遺孤被掠氏爲舅姑

增修甘泉縣志 卷十一
營喪哭泣幾喪明後養賢自金陵逃歸依母不離晝夜
年三十始娶張氏又能佐夫奉姑胡歿年六十四養賢
以哀毀致疾延十數年亦死張守節三十餘年其貞操
與姑畧同勞心課子年七十四而終子道成歲貢生道
茂邑庠生孫王謨戊午經魁王賓郡庠生

續志考正道成係康熙四十年貢選舉貢生內脫
孫氏姜秉文妻年二十六而寡遺孤昌謨甫六月氏茹
荼撫孤以十指所獲延師課子白衣鶉結食藜藿冰操
二十四年子今成立鄉黨賢之
邱氏生員劉駿妻年二十夫歿守節撫子楫入庠歷十

五年邱歿楫妻姚氏年二十七夫亦歿守節撫子及孫
俱成立 雍正江都縣志

續志考正姚氏後複出

羅氏余有慶妻夫亡遺二子家貧甚躬操作得升合以
養子復傭身於大戶所得一錢尺布皆苦積營地葬夫
歷苦節五十五年 同上
呂氏高文或妻年二十九夫歿撫孤苦志二十三年郡
縣旌之

徐氏嵇良甫妻年二十夫歿撫遺腹子成立苦節三十
一年 同上

增修甘泉縣志 卷一十
員氏貢生履祥女字吳彭元年十九未嫁而彭元歿女聞痛哭不欲生始投繯家人解救繼絕粒父母婉勸之女誓守貞不二其舅姑因以禮迎歸哭夫甚哀執婦道惟謹踰年以嫡姪植爲嗣 同上

高氏金維礪妻年二十九夫亡號慟矢殉念夫僅遺一女無乳則不生是並斬其餘息也依叔守節足不踰閨闕凜然松柏歲寒之操乾隆元年旌表

方氏吳正瀚妻夫亡年二十三欲以身殉因姑老視息人間雖貧乏能以自存而竭力奉養喪葬盡禮今五十二歲乾隆三年題旌 二十十八夫亦歿守節五十

史氏府學生錢元禧妻夫亡年二十九歲守節四十五年治女紅以撫孤孫乾隆三年題旌

吳氏府學生錢葆祿妾守節三十一年乾隆五年題旌

史氏監生潘榮植妻夫亡氏年二十九守節三十七年曹氏湯九錫妻賢孝有聲守節三十二年乾隆三年題旌

汪氏貢生姚藹妻幼嫻書史知循孝道守節四十九年乾隆三年題旌

范氏監生吳都妻孀姑病篤刲股禱天夫家非豐裕能

增修甘泉縣志 卷十七
週濟三黨之貧窶者守節二十一年而卒乾隆三年題旌

王民生員林文奎妻守節四十九年學使者表其閭乾隆五年題旌

焦貞女許字儒童林廣未婚而夭女跪請父願歸夫家父不能違其志里人稱之

徐氏李文元妻夫亡苦節自勵歷六十餘年乾隆五年題旌

吳氏王自秩繼妻守節三十一年雍正江都縣志

虞氏張之通繼妻守節三十一年同上

于氏陳達妻守節三十年同上

梁氏高凌妻守節五十餘年同上

鮑氏閔學妻守節三十一年同上

薛氏嚴某妻守節三十二年同上

方氏謝士位妻守節五十一年同上

蔡氏田益俊繼妻守節四十五年同上

項氏年十九許字郡庠生羅睿謀爲妻未嫁夫歿誓志不二守貞而死同上

程氏謝應璜妻守節五十二年同上

朱氏尤雲生妻守節二十八年同上

程氏黃以澄妻夫歿年二十六歲守節四十五年

續志考正後複出

張氏龔鼎妻夫歿年二十四歲守節四十三年

楊氏張士賢妻夫歿年十九歲守節三十五年

續志考正已見前

陳氏杜英傑妻夫歿年二十八歲守節五十七年

貞女錢氏許字胡立恒立恒死女年二十二歲矢志不

更適守貞三十六年 以上乾隆元年題 旌

鄭氏吳宏位妻夫歿年二十八歲守節五十年

胡氏吳蕃廕妻夫歿年二十二歲守節三十七年

蔣氏周維熊妻守節四十餘年 以上乾隆二年題 旌

劉氏裕州知州謝震側室隨在官所能佐素絲之節夫
亡氏年二十八歲幾不欲生以大婦慰諭守志終其身
姚氏生員劉楫妻以紡績佐讀夫困場屋不得志而死
故氏課子若孫甚嚴守節三十八年

續志考正已見前

閻氏趙以蘭妻夫患瘵疾侍湯藥三年無倦容夫亡氏
年二十五歲孝養二親長子早夭次子授室而歿與寡
媳談氏相依冰霜輝映里黨稱之

陳氏生員史繼夔繼配事姑孝事夫敬夫既亡矢志不

二門內以整肅見稱現今七十六歲守節五十年矣

丁氏楊廷鏞妻孝經列女傳畧能上口故于閨中大節

咸克有焉夫亡守志今三十載矣

程氏鄭為倬妻夫亡以後嗣為重身不克殉備歷荼苦

以教子成立今六十二歲守節三十三年

戴氏馬順甫妻夫亡心如皎月垂老子媳俱喪撫一孤

孫現年八十六歲含辛茹苦將六十年矣

汪氏凌光杰妻賦性端莊克盡婦職夫亡舅姑甘旨未

嘗有缺守節二十六年終

史氏潘倬妻夫亡撫遺孤三人延師家塾皆能成立其

次子適中更有文彩

薛氏徐爾揚妻爾揚得川省主簿將之任謂薛曰微官

萬里不能將母奈何薛曰君無慮吾能養之及夫歿敬

以承祭嚴以訓子守節五十七年歷今八十五歲乾隆

三年 旌

續志考正已見前

楊氏王廷儀妻夫亡氏年二十八歲今守節四十七年

程氏沈信妻年二十九喪夫又二年其翁歿家無宿春

程隻手營兩喪撫一子擇師教之守節三十九年乾隆

二年 旌

劉氏邑庠生蔣繼韓繼妻夫亡時年二十四歲守志歷今二十三年

胥氏潘文聘妻守節荼苦歷三十二年

侯氏李大貴妻夫亡氏年二十七歷今三十三年

史氏潘榮正妻榮正素抱羸疾史殫辛苦奉侍之封股調藥不效而卒史年二十九育子成立守節三十七年

許氏汪文蔚妻守節二十六年 同上

高氏徐日章妻守節四十八年 同上

唐氏童聖公妻守節五十餘年 同上

楊氏監生王廷儀妻守節四十餘年 同上

喜氏卞咸遂妻守節四十三年 同上

孫氏汪瑋妻守節五十年 同上

高氏武舉劉臨地妻守節三十一年乾隆元年 旌

李氏高士衡妻撫遺腹子守節三十年

范氏何天爵妻守節二十七年乾隆元年 旌

韓氏監生李宏泌妻克孝尊嫜勉夫力學夫亡氏年二十二守節二十九年

程氏黃以澄妻夫歿氏年二十六歲守節四十五年乾隆元年題 旌

續志考正已見前

增修甘肅縣志 卷十七
鈕氏王德麟妻夫歿氏年二十一歲守節四十三年
林氏張之傑妻傑歿氏年二十一歲守節二十五年
徐氏宰儒生妻年二十五歲夫亡敬事孀姑竭力奉養
當夫歿時氏哀慟幾絕水漿不入口數日黨族勉以撫
孤乃止苦節四十三年現年六十七歲乾隆六年題

旌

徐氏井尙賢妻年十九夫亡氏哀毀骨立將以身殉因
三子俱幼存身以教其成立井夙無家產四壁蕭然氏
乃勤女工以自給并延師以教諸子茹荼冰蘖不苟笑
言歷苦節四十一年存年六十九歲今卒乾隆六年題

旌

胡氏文興吾妻年十九夫亡守節三十六年

汪氏監生李宏沂妻宏沂早逝氏年二十苦節三十年

嚴氏范安康繼妻年二十八歲夫亡守節四十六年歿

邱氏教諭郭振基妾郭歿氏年二十八歲哀毀不食者

數日無子撫嫡孤成立乾隆二年歿

徐烈婦郭宗富妻郭常早出門徐獨處一室有無賴子
儲滄者悅其少艾入室挑之徐隨詈隨避走滄尾後以
手拍其肩徐大叫聲聞於鄰得免夫歸具訴其事夫隱
忍未發明晨夫出徐忿恚縊死乾隆元年 旌

蕭氏年十五歸太學方琨為側室至十九歲夫亡敬事其嫡而嫡所生一子又天蕭切請繼一姪為夫後經營兩喪守節垂五十年乾隆元年旌

吳氏許聘閻蓬生未嫁蓬生死女悲悼請歸閻終喪不果泣曰願從夫地下庶無憾竟死得合葬焉

曹氏生員韓汝泰妻夫歿氏年十九守節三十六年

周氏石守忠妻夫歿氏年二十五守節四十六年

汪氏張宗猗妻夫歿氏年二十八守節三十四年

吳氏戴志彬妻夫歿氏年二十七歲守節三十五年

乾隆四年旌

胡氏方士正妻夫歿氏年二十八守節四十三年
畢氏監生范永春妻夫歿氏年二十九歲守節三十六年

劉氏楊政東妻未適而夫亡氏聞計絕食幾死夫家迎歸守節未及一年氏亦病故

黃氏王遵璜妻夫歿氏年二十七守節四十二年

賈氏常允中妻夫歿氏年二十四歲守節四十年

史氏王詔妻夫歿氏年二十八歲守節三十一年

李氏王儀縉妻夫歿氏年二十八歲守節四十四年

劉氏趙大武妻夫歿氏年二十四歲守節三十六年

王氏顧文煜妻夫歿氏年二十二歲守節三十年

史氏呂繼臨妻夫歿氏年二十四歲守節二十八年

李氏貢生韓維翰妻夫歿氏年十九歲守節三十一年

王氏貢生楊廷鈞繼妻夫歿氏年二十二歲守節三十

二年

張氏陳穎儒妻年二十六夫亡守節二十七年

陳氏張彭年妻夫歿氏年二十六歲守節四十一年

乾隆五年題旌

顧氏史在策繼妻夫歿氏年二十四歲守節四十七年

許氏汪可鈞妻夫歿氏年二十三歲守節四十四年

李氏張元漢妻夫歿氏年二十七歲守節四十一年

史氏饒永基妻二十六歲夫亡撫七歲子長又卒氏經

營兩喪皆出女工守節三十八年

胡氏訓導劉豐穀妻年三十夫卒於官氏攜孤扶櫬而

歸教子讀書有成列於庠序守節二十三年

吳氏呂宏統妻年十九夫亡撫二齡孤子守節二十三

年

韓氏金殿宣妻年二十九夫亡守節四十一年

陳氏庠生朱伸妻年二十五夫亡守節二十七年

梁氏生員孫林妻夫亡守節二十三年

雷氏貢生錢志遷繼妻二十三夫亡守節三十四年

方氏呂九遠妻年三十夫亡守節五十二年

蘇氏黃霖霍妻二十八歲夫亡守節四十五年

韓氏史統義妻二十五歲夫亡守節三十九年

程氏吳之英妻二十八歲夫亡守節三十四年

江氏汪懋思妻年二十三夫卒守節三十五年

李氏王爾愛妻年二十七夫亡撫四齡孤子恒德守節

三十二年

方氏張起龍妻年二十一夫亡撫三齡孤子守節三十

四年

祁氏顧旭華妻年十九夫亡守節三十四年

舒氏孫秉文妻年二十夫亡守節二十三年已卒

于氏申承基妻年二十五歲守節二十年已卒

仇氏赤岸湖農民貢成儀妻年十五而嫁十九而寡生

二子方襁褓翁姑憐其少諷之改適氏曰翁姑得子遲

故娶媳蚤今子死媳即子也忍有他志乎隨翁姑力作

以育二藐孤孝慈兼至歷今二十餘年兩孤皆授室氏

且抱孫矣鄉人咸稱重焉

割股救翁者

劉氏蘇登甲妻

劉氏蘇謙妻

吳氏方伯妻

程氏汪之炅妻

高氏貢生仇維翰妻

楊氏許渥妻

雍正江都志

割股救祖翁姑者

胡氏焦熾妻

割股救父母者

孫氏韓日暹妻

朱氏女名月恒

王氏馬亮妻

王氏張宗仲妻

樊氏生員史積璋妻

割股救夫者

王氏吳如璵妻

文氏王詢妻

熊氏王汶妻

錢氏諸生李宏永妻

王氏卞國柱妻

以上原志

以士訓法

王升才國林妻

魏刃梅李李李永妻

魏刃王李妻

王刃王此妻

王刃吳順妻

陳佩姑夫首

樊刃坐買安耐軍妻

王刃張宗村妻

王刃馮泉妻

